


# গুণিণ গুণ্ডখাতা

লীলা মজুমদার



## গুণীর গুপ্তখাতা

এক

অনেকদিন আগের ঘটনা, ভুলে যাব মনে করে সব এই লিখে দিলাম। রোজরোজ একরকম হত, হঠাৎ একদিন এমনি হল যে মনে করলে এখনো গা শিরশিরু করে।

একটা গাড়িতে ঠান্দিদি, শ্রামাদাসকাকা, বিরিকিদ্দা আর আমি।

গাড়ি চলেছে তো চলেইছে, থামবার নামটি করে না। এদের কি খিদে তেপ্তাও পায় না? সঙ্গে কিছু নেই তা তো নয়। ঐ টিফিন-কারিয়ার একদম বোঝাই করা এই বড়-বড় চপ লুচি আলুরদম শোনপাপড়ি।

খিদের চোটে পেটটা ব্যথা-ব্যথা করছে। উঠেছি সেই কোন ভোরে। তত সকালে কখনো আমার ঘুম ভাঙে না। কাকেরা ডাকে নি, যারা রাস্তায় জল দেয় তারা আসে নি, আকাশ তখনো নীল হয় নি, তারারা নেবে নি, বগাই ওঠে নি, খাটের পায়ার কাছে নাক ডাকাচ্ছে আর ঘুমের ঘোরেই একটু একটু ল্যাজ নাড়াচ্ছে।

বগাইয়ের জন্ম খুব খারাপ লাগছে। বেশ আমার পাশে কুণ্ডলী পাকিয়ে বসে থাকত। কাউকে কিছু করত না।

অত ভোরে উঠতে হয় না। পাশ ফিরে আবার ঘুমুতে যাব, এমনি সময় কানে এল খুটখুট ঠুকঠাক্ গুজ্গুজ্ ফিস্ফিস্। মনে হল ঘর কথা কইছে, ঘরের বাইরের কেঁপুঁচুড়োর গাছ কথা কইছে। এত কথা বলাবলির মধ্যে ঘুমুই কি করে?

উঠে পড়লাম। দোর-গোড়ায় গিয়ে দেখি কিনা আমার ঠান্দিদি সারা গায়ে চাদর মুড়ি দিয়ে, মস্ত এক পুঁটলি বগলে ফস্ফস্ করে সিঁড়ি দিয়ে নীচে নেমে যাচ্ছেন।

আর কথাটি নয়, ছুটে গিয়ে পেছন থেকে ঠান্দিদিকে জাপটে ধরলাম। ঠান্দিদি এমনি চমকে গেলেন যে আরেকটু হলে পড়েই যাচ্ছিলেন। তবেই হয়েছিল আর কি! চ্যাঁচামেছি করে একাকার কাণ্ড করতেন, তখন যাওয়া-টাওয়া সব বন্ধ।

আমি বললাম, “কোথায় যাচ্ছ তোমরা?”

কোনোরকমে সামলিয়ে নিয়েই আমার মুখ চেপে ধরে ঠান্দিদি বললেন, “স্-স্-স্।”

বলে আঙুল দিয়ে সিঁড়ির নীচেটা দেখিয়ে দিলেন।

সিঁড়ির নীচে ছুটে লোক হাতছানি দিয়ে ঠান্দিদিকে ডাকছে। দেখলাম তারা হল পাশের বাড়ির বিরিকিদি আর আমার শ্যামাদাসকাকা। তা হলে কি হবে, আমাকে দেখে সবাই কি বিরক্ত! একে আবার কেন আনা হল? এখুনি সব মাটি করে দেবে।

রেখে টেঁচিয়ে বললাম, “বেশ, বেশ, আমি নাহয় ফিরেই যাচ্ছি সেজদাদামশাইকে গিয়ে সব বলে দিচ্ছি—ও সেজদাছ—”

অমনি সব ভোল বদলে গেল, তখন আমাকে সে কি সাধাসাধি। লক্ষ্মীটি চূপ কর। চল, তোকে কাটলেট খাওয়াব, গাড়ির মধ্যে চেয়ে ছাঁখ, টিফিনক্যারিয়ারে ভর্তি চপ কাটলেট ডিমের ডেভিল। কারো কাছে কিছু বলিস নি কিন্তু।

অবাক হয়ে দেখি গলির মুখে সত্যি সত্যি বিরিকিদির রঙচটা পুরোনো ফোর্ড গাড়িটা দাঁড়িয়ে। ভেতরে মেলা জিনিস আর একটা বিরাট পেতলের টিফিনক্যারিয়ার।

মাথার ওপরে চেয়ে দেখি আকাশের রঙ একটু ফিকে হয়ে এসেছে, তার ওপর দিয়ে কালো এক বাঁক পাখি বাঁকা হয়ে উড়ে যাচ্ছে, তাদের ডানার ঝাপটানি শুনতে পেলাম।

আর বলতে হল না। এক দৌড়ে ওপরে গিয়ে নতুন জুতোটা পরে নিলাম, একটা প্যান্ট শার্ট নিলাম, চোখেমুখে জল দিয়ে, ভালো করে চুলটা ঝাঁচড়ে, লাট্রু লেভি, খুদে আয়না-চিরুনি ইত্যাদি দরকারি জিনিস

পকেটে পুরে, তিন মিনিটের মধ্যে গাড়িতে গিয়ে চেপে বসলাম। মা বাবা বোম্বাই গেছেন, পুঁটলিও গেছে সঙ্গে, কাউকে কিছু বলতেও হল না। নইলে আর যাওয়া হয়েছিল!

এসে দেখি বিরিঞ্চিদা ঘন ঘন হাতঘড়ি দেখছে, যেন আমার জন্ম কতই না দেরি হয়ে গেছে। সেধে তো সঙ্গে নিয়েছ বাপু, এখন তেজ দেখালে চলবে কি করে। বুকটা একটু একটু টিপ্‌টিপ্ করছিল। এখন এই শেষ মুহূর্তে ধরা পড়লেই তো সব পণ্ড! সেজদাত্তর নাকি ইত্থরের পায়ের শব্দে ঘুম ছুটে যায়।

কিন্তু কিছু হল না। বিরিঞ্চিদার গাড়ি, তবে বিরিঞ্চিদা দারুণ ক্যাবলা; গাড়ি চালাতে ভয় পায়। তাই শ্যামাদাসকাকা চালাচ্ছে। আমি গিয়ে তার পাশে বসলাম। পারলে আমি কখনো পেছন বসি না। শ্যামাদাসকাকা খুব ভালো গাড়ি চালায়, স্টার্ট দিতে এতটুকু আওয়াজ হল না। ঐ তো লড়বড়ে গাড়ি, মনে হয় চলতে গেলে এখনি সব খুলে খুলে পড়ে যাবে।

কাছাকাছি কোথাও নয়, চললাম সটান কলকাতার বাইরে। পথঘাট ভেঁা ভাঁ, এত ভোরে কারো ঘুম ভাঙে নি। মাটি থেকে এক হাত ওপরে একটা ধোঁয়া মতো বিছিয়ে রয়েছে। ঠাণ্ডা ঠাণ্ডা হাওয়া দিচ্ছে।

আস্তে আস্তে ভোর হয়ে এল, পূর্ব দিক ফরসা হবার আগেই দেখলাম পশ্চিম দিকটা লাল হয়ে উঠেছে। গোয়াল ঘরে সব গোবুরা ডাকতে লাগল, এখান থেকে ওখান থেকে মুরগিরা বেরিয়ে এল। গাঁয়ের লোকদের জেগে ওঠা দেখতে পেলাম।

গাড়িতে কেউ কথা বলে না। এমনিতেই বিরিঞ্চিদার গাড়িতে এমনি দারুণ শব্দ হয় যে খুব না চ্যাঁচালে কিছু শোনা যায় না। তার ওপর মনে হল এদের সবার মনে যা ভয়। দু-একবার জিগ্‌গেসও করলাম, কিন্তু কেউ কিছু বলে না, উলটে সে কি ধমক-ধামক করতে লাগল। কি দরকার রে বাবা। তোর ভয় পেলে আমার আর কি

খিদে খিদে পাচ্ছিল; কাল রাতে পিসিমার কড়াইতে আঠা তৈরি

করা নিয়ে রাগমাগ করে ভালো করে খাই নি, তার এখন কত বেলা হয়ে যাচ্ছে, কেউ খাওয়া-টাওয়ার কথা বলে না কেন ?

নড়ছি-চড়ছি, এমনি সময় বিরিঞ্চিদা আমার কানের কাছে মুণ্ডটা এনে বলল, “এই চুপ করে বোস না, বেশি কথা-টখা বলিস না, তা হলে তোকে এই এত বড় একগাদা চুইং-গাম দেব।”

আমি তো অবাক। একটা টিকটিকির ল্যাজ কাউকে কখনো দেয় না, ও দেবে আমাকে একগাদা চুইং-গাম। তবেই হয়েছে!

এমনি করে কত মাইল যে চলে এসেছি তার ঠিক নেই। বেশ বেলা বেড়েছে এমন সময় দূর থেকে দেখি রাস্তা যেখানে রেলের লাইন পার হয়েছে, সেখানে বিরাট তেঁতুলগাছের তলায় মেলা লোকের ভীড়।

বেশ খানিকটা দূরেই আছি, কিন্তু শ্যামাদাসকাকা দেখলাম খুব ঘাবড়েছে। স্ট্রিয়ারিটাকে কবে চেপে ধরেছে, হাতের গিটগুলো সব সাদা সাদা হয়ে উঠেছে। চুলগুলোও খাড়াখাড়া, সারা কপাল জুড়ে এই বড়-বড় ঘামের ফোঁটা।

সত্যি বিষম ভীড়। আরেকবার অবাক হয়ে যেই শ্যামাদাসকাকার দিকে তাকিয়েছি, সে কর্কশ গলায় বলল, ‘কিছু করবার না থাকে তো আমার দিকে না তাকিয়ে বুড়ো আঙুল চোষ।’

ততক্ষণে শ্যামাদাসকাকার কপালের পরোনো ঘামগুলো গলে গিয়ে নদী হয়ে, ওর জামার গলা দিয়ে নামতে লেগেছে আর তার জায়গায় নতুন সব ঘামের ফোঁটা দেখা দিয়েছে।

ভিড়ের কাছে গিয়ে পৌঁছলাম! দেখি একটা চা-গুলা তার ছোট্ট তোলা উম্মন, চোঙা দেওয়া পেতলের চা-দানি আর টুকরি করে মাটির ভাঁড় নিয়ে, একেবারে কাছ ঘেঁষে বসে আছে। কিন্তু শ্যামাদাসকাকা যেন দেখতেই পাচ্ছে না।

মুখু খুরিয়ে পেছনের সীটের দিকে চেয়ে দেখলাম ঠান্দিদি আর বিরিঞ্চিদাও চোখ গোল গোল করে এ ওর দিকে চেয়ে আছেন, গালের রঙ ফ্যাকাশে, মুখে কথাটি নেই। কি জানি বাবা।

ভিড়ের জঞ্জ গাড়ি থামাতে হয়েছে। উঠে দাঁড়িয়ে মুণ্ড বাড়িয়ে দেখতে চেষ্টা করছিলাম যারা ট্রেনে কাটা পড়েছে তাদের মাথাগুলো একেবারে আলাদা হয়ে গেছে কি না।

কিন্তু কিছু দেখা গেল না, মড়া না, কিছু না। চা-ওলার কাছে দেখলাম কাচের বাস্কে বাঁদর-বিস্কুট। কি ভালো খেতে বাঁদর-বিস্কুট, শক্ত, সৌন্দ্য গন্ধ, চমৎকার! কিন্তু পয়সাকড়ি নেই।

এদিকে এরা সব যেন ভয়ে কাঠ।

ভিড়ের মধ্যে চেয়ে দেখি ঠাসাঠাসি গাদাগাদি করে রয়েছে সন্দেহ-জনক কত যে লোক তার ঠিক নেই। সেইসঙ্গে লাঠি হাতে নীল পাগড়ি কত পুলিশ! কিছু একটা যে ঘটেছে সেটা ঠিক।

ডেকে জিগ্গেস করতে গেলাম, এই পাহারাওয়ালো, কুছ ছয়া?" কিন্তু জিগ্গেস করব কি, মুখ হাঁ করতেই বিরিঞ্চিদা আর ঠান্দি ফিরে আমার মুখ চেপে ধরলেন। আর শ্যামাদাসকাকা পর্যন্ত আমার দিকে ফিরে বললে, "ইডিয়ট!"

সামনেই একটা রোগা লোক দাঁড়িয়েছিল, গায়ে গেঞ্জি, পরনে লুঙ্গি, চুল কঁকড়া তেল-চুকচুকে।

সে আমাদের গাড়ির পাদানির ওপর চড়ে পান-খাওয়া লাল দাঁত বের করে হাসতে লাগল। দেখলাম ওর কানে সোনার মাকড়ি পরা আর একটু করে চুণ লাগানো। তা হলে নাকি পান খেলেও মুখ গোড়ে না। একদিন দেখতে হবে।

লোকটা নিজের থেকে বললে, "এখানকার জমিদারবাবুর স্ত্রীর মূক্তোর মালা হারিয়েছে! তাই ধরপাকড় চলছে।"

আমাদের গাড়ির লোকেরা এতক্ষণ কাঠ-পুতুলের মতো সামনের দিকে চেয়ে বসেছিল, এবারে তিনজনে একসঙ্গে বিষম একটা স্বস্তির নিশ্বাস ফেলে, ঐ লোকটার সঙ্গে মেলা গল্প জুড়ে দিল।

ঐখানে লেভেলক্রসিং-এর ধারে, ভিড়ের পাশে গাড়ি দাঁড় করিয়ে, শ্যামাদাসকাকা ও বিরিঞ্চিদা আর ঠান্দিদি সেই লুঙ্গিপরা মাকড়ি-কানে

অচেনা লোকটাকে কি যে না বলল তার ঠিক নেই।

অবাক হয়ে সব শুনলান ; আগে এ-সব কিছুই জানতাম না।

বলল আমরা নাকি মোটরে গয়া যাচ্ছি ঠান্দিদির বাবার পিণ্ডি দিতে। অথচ ঠান্দিদির যে আবার বাবা আছে এ তো কখনো শুনি নি। নিজেই উনি যথেষ্ট বুড়ে।

ঠান্দিদি নাকি পিণ্ডি দেবেন, বিরিঞ্চিদা জোগাড় দেবে, শ্যামাদাস-কাকা গাড়ি চালাবে। আর আমি হলাম ঠান্দিদির নাতি, নাকি কেঁদে-কেটে সঙ্গ নিয়েছি, ঠান্দিদিকে ছেড়ে একদণ্ড থাকতে পারি না।

এই বলে ঠান্দিদি আমার মাথায় হাত বুলিয়ে চুল নোংরা করে দিলেন। আমি এমনি অবাক হয়ে গেছলাম যে কিছু বললাম না। শুধু পকেট থেকে আয়না-চিরুনি বের করে, চুলটাকে যত্ন করে ফের আঁচড়ে নিলাম। আশা করি এতেই ঊঁকে যথেষ্ট শিক্ষা দেওয়া হল।

ঠিক সেই সময় সাদা পেটেলুন পরা কালো ইন্সপেক্টরবাবু ভিড় ঠেলে এসে হাজির। আর অমনি লুঙ্গিপরা লোকটা টুপ করে নেমে হাওয়া।

শ্যামাদাসকাকাও ঘন ঘন হর্ন দিতে লাগল, ঠান্দিদি আর বিরিঞ্চিদা হৈদিক-উদিক গাছপালা দেখতে লাগলেন, যেন কিছুই জানেন না!

ইন্সপেক্টরবাবুকে শ্যামাদাসকাকা সিগারেট খাওয়াল, আর সে বললে, “ও-কে।”

অমনি ভিড়টা ছুভাগ হয়ে গেল আর আমরা রেলের লাইন পার হয়ে, ওপারের পথ ধরলাম।

আর থাকতে পারলাম না। স্ট্রিয়ারিং-এর ওপর শ্যামাদাসকাকার হাতটা চেপে ধরে বললাম, “বলতেই হবে কেন পালাচ্ছ তোমরা।”

ওর হাতটা অমনি স্ট্রিয়ারিং থেকে খসে গেল আর গাড়িটাও ল্যাগ-ব্যাগ করে উঠল। শ্যামাদাসকাকা তো হাঁ।

পেছন থেকে ঠান্দিদি গস্তীর গলায় বললেন, “পেছনে ছলিয়া লেগেছে, না পালিয়ে উঁপায় নেই।”

দুই

হলিয়া লেগেছে। ইস্। শ্যামাদাসকাকার কাছে আরেকটু ঘেঁষে  
বসলাম। সে বললে, “উ! উ! গিয়ার চিপ্‌কিও না।”

বিরিঞ্চিদা বললে, “আমার ফেরারি, ঘরবাড়ি ছেড়ে চিরকালের  
মতো চলে যাচ্ছি। হল এবার? ভোর-ইস্তক খালি বলে—কোথায়  
যাচ্ছি, কেন যাচ্ছি। কেমন, এবার খুশি তো?”

ঠান্দিদি ব্যস্ত হয়ে বললেন, “না, না, চিরদিনের জন্ম নয় মোটেই।  
ডিসেম্বর মাসে ওর পরীক্ষা না? তা ছাড়া মসলার কোটা তো ফেলে  
এসেছি। তার জন্মও একবার ফেরা দরকার।”

তার পর সবাই চুপচাপ।

কে জানে হলিয়ারা কামড়ায় কি না।

পথটা ক্রমে নির্জন হয়ে এসেছে। ছপাশে বড়-বড় বটগাছ পথের  
ওপর ঝুঁকে পড়ে, পাতায় পাতায় মিলিয়ে, মাথার ওপর যেন ছাদ তৈরি  
করছে।

বিষম নিরিবিলা। এত নিঝুম যে দিনের বেলাতেও ঝিঁঝিঁ পোকা  
ডাকছে। শুনতে শুনতে কেমনধারা ঘুম এসে যায়। মনে হয় ঝিঁঝিঁরা  
কত দূরে চলে যাচ্ছে। আবার কাছে আসছে।

শ্যামাদাসকাকা হঠাৎ পথের ধারে গাছতলা ঘেঁষে গাড়ি থামিয়ে,  
ফৌস্ ফৌস্ করে নিশ্বাস ফেলতে লাগল।

অমনি আমিও সিটের পেছনে চড়ে বসে ঠান্দিদির দিকে মুখ করে  
রেগে বললাম, “কেন বললে কান্নাকাটি করে সঙ্গে নিয়েছি? তোমরা  
নিজেরা আমাকে জোর করে ধরে আনো নি? কার্টলেট খাওয়ার লোভ  
দেখিয়ে, চুইং-গাম দেবে বলে আমাকে নিয়ে আসো নি? পাছে  
সেজদাহুকে সব বলে দিই সেই ভয়ে।”

ওরা তার কোনো উত্তর না দিয়ে, নিশ্বাস বন্ধ করে একসঙ্গে বলল,  
“কি সব বলে দেবে? তুমি তার কি জানো?”

কি আর করি, পকেট থেকে টিনের ব্যাঙ বের করে কট্ কট্ করতে



লাগলুম। তাই দেখে ওরাও আবার সব আরাম করে বসল। রুমাল দিয়ে ঘাম মুছবে বলে শ্যামাদাসকাকা পকেটে হাত পুরে দিল। দিয়েই কিন্তু একহাত লাফিয়ে উঠে চাপা গলায় বিরিঞ্চদাকে বলল, “বিরিঞ্চি, দেখ তো পকেটে যা মনে হল, সত্যি সত্যি তাই কি না।”

বিরিঞ্চিদা পেছনের সিট থেকে বুকে পড়ে সোজা শ্যামাদাসকাকার পকেটে হাত চালিয়ে দিল। টেনে বের করল এক ছড়া মুক্তোর মালা। ঠিক যেমনটি গোপলার বইতে পড়েছিলাম, গোল গোল জমানো চোখের জলের মতো এক ছড়া মুক্তোর মালা। তাতে সকালবেলার রোদ পড়ে লাল নীল সবুজ রঙ ঠিকরোচ্ছে। শুনেছি এ-সবের জন্ম রক্তগঙ্গা বয়।

ঠান্দিদি বললেন, “ইস্ শ্যামাদাস, তোর পেটেও এত ছিল।”

বিরিঞ্চিদা বলল, “তুই সব পারিস রে শ্যামাদাস। কিন্তু কখন করলি তাই ভাবছি।”

আমি বললাম, “শ্যামাদাসকাকা করবে জমিদার-গিম্মির মালা চুরি! আরগুলো দেখলে ওর দাঁতকপাটি লেগে যায়, ও করবে চুরি! কি হয়েছে বলব? ঐ লুঙ্গিপরা লোকটি নির্ধাৎ মালাটা ওর পকেটে চালান করেছে। ধরা পড়বার ভয়ে।”

ঠান্দিদি শিউরে উঠে বললেন, “ওরে শ্যামাদাস, রুমাল দিয়ে ওটাকে মুছে ফেল রে। ছুঁয়েছিস ওটাকে, মুক্তোগুলোতে তোর আঙুলের ছাপ পড়েছে।”

বিরিঞ্চিদাও বলল, “এবার কে তোকে বাঁচায় দেখব। তোর পেছনে গোয়েন্দা লাগবে দেখিস। আর গোয়েন্দার হাত এড়ালেও ঐ লুঙ্গি-পরটা রয়েছে। দেখিস ঐ মালা উদ্ধারের জন্ম কত রক্তপাত—”

এই অবধি শুনেই শ্যামাদাসকাকা মালাটা পকেটে পুরে কোনো কথা না বলে গাড়িতে স্টার্ট দিল।

দেখলাম ওর চেহারাটা কেমন বদলে গেছে। চোখ ছোট হয়ে গেছে; গায়ের রঙ, কানের শেপ সবই অস্বরকম লাগছে। মালাটা বোধ হয় ওর ছাড়বার ইচ্ছে নেই।

হঠাৎ বিরিঞ্চিদা বলে উঠল, “এই রে শ্যামাদাস! পেছনে একটা গাড়ি লেগেছে।”

ব্যস, আর বলা-কওয়া নেই, সটান শ্যামাদাসকাকা বড় রাস্তা ছেড়ে বনবাদাড়ে নেমে পড়ল। গাছ-গাছড়ার মধ্যে দিয়ে আঁকা-বাঁকা মেঠো পথ। তারই ওপর দিয়ে শ্যামাদাসকাকা দিব্যি গাড়ি চালিয়ে চলল।

কেউ কোনো আপত্তি-করল না। যাক গে যেখানে খুশি, খিদের চোটে আমার কিছু ভালোও লাগছিল না। তবু ছ-একবার বললাম, “তোমরা আজ খাবে না?”

কি জ্বালা! কেউ কোনো উত্তর দেয় না।

পেছন ফিরে বললাম, “তবে আমি খাই?”

খড়্-খড়ে গলায় ঠান্দিদি বললেন, “সারাক্ষণ শুধু খাই—খাই। বনছি পেছনে ছলিয়া লেগেছে।”

“ছলিয়া আবার কি?”

বিরিঞ্চিদা বিরক্ত হয়ে বলল, “শ্যাকা! ছলিয়া আবার কি! ধরলে পর টেরটা পাবি।”

চার দিকে ঝোপ-ঝাপ, উঁচু-উঁচু গাছের শেকড়, মাঝে মাঝে একটু-খোলা জায়গা, বড়-বড় কালো পাথর; খানিকটা মাটি ভেঙে গেছে, পাথর আর ছিবড়ের মতো গাছের শেকড় বেরিয়ে রয়েছে। এ-সব জায়গায় ছুঁড়র থাকে। তারা ছোট পাঁঠা-টাঁঠা ধরে তো নিয়ে যায়ই, মানুষদেরও খায়-টায়। আমার দিক্কার দরজাটা আবার লগ্-বগ্-করে, একটু একটু করে ঘন্টে ঘন্টে শ্যামাদাসকাকার দিকে এগুচ্ছি, সে আবার খেঁকিয়ে উঠল, “বলছি গিয়ার চিপ্-কিও না। সরে বোসো।”

বললাম, “দরজাটা যদি খুলে যায়? এত আস্তে চালাচ্ছ কেন? কিছুতে যদি লাফিয়ে পড়ে?”

শ্যামাদাসকাকা বিরক্ত হয়ে তখনি গাড়ি থামিয়ে বলল, “বেশ তো, আমার চালানো পছন্দ না হয়, তুমিই চালাও না। কি সুন্দর রাস্তা দেখছ না। তুমি এদিকে এসো, আমি ওধারে যাই।”

ততক্ষণে রাস্তাটা সরু হতে হতে একটা পায়ের-চলা পথ হয়ে দাঁড়িয়েছে। গাছগুলোও ভিড় করে এসেছে। সত্যি বলছি ঝাঁঝিঁর ডাকে কান ঝালাপালা হয়ে যাচ্ছিল। ঝাঁঝিঁর ডাকে কিরকম মন খারাপ লাগে; খিদেও পাচ্ছিল। পকেট থেকে টিনের ব্যাঙটা বের করে আবার কটকট করতে লাগলাম।

আরো খানিক দূর যাওয়া গেল। শেষটা বটগাছের তলায় শ্যামাদাস কাকা গাড়ি থামাল।

চার দিক থমথমে চূপচূপ। ঝাঁঝিঁর ডাক, পাতার শিরশির্ আর দূরে কোথায় জল পড়ার শব্দ। এই সব জায়গাতেই বোধ হয় ছুঁড়ুরা জল খেতে আসে। ছোট নদীর ধারে, বালির ওপর দিয়ে হেঁচড়ে কিছু নিয়ে গেলে, তার দাগ দেখা যায়। কিন্তু তখন আর কিছু করবার উপায় থাকে না। খিদে।

তখন শ্যামাদাসকাকা নিজে থেকেই বললে, “খিদেয় পেটের এদিক-ওদিক জুড়ে গেছে।”

যাক, বাঁচা গেল।

বিরিঞ্চিদা আমাকে বলল, “ওঠ না। আমার পায়ের কাছ থেকে টিফিনক্যারিয়ারটি নামিয়ে খোল দিকিনি। কুঁজোয় জল আছে, বের-টের কর। আমার এখনো হাত-পা কাঁপছে, পেটের ভিতর কেমন যেন করছে। নে, বের কর।”

টিফিনক্যারিয়ার খুলে দেখি লুচি, পটলভাজা, আলুরদম, মাংসের বড়া, জিবে-গজা। যদিও ডিমের ডেভিল, শোমপাপড়ি মোটেই নেই। দরজার খোঁপে পুরোনো খবরের কাগজ ছিল, তাতে করে বন্ধ করে ওদের খাওয়ানাম। শ্যামাদাসকাকা কুড়িটা লুচি খেল; বিরিঞ্চিদারও দেখলাম ভয়ের চোটে খিদে বেড়েছে। খালি ঠান্দিদি নাক সিঁটকে একটু দূরে বসে ফলমূল খেলেন।

কিন্তু আমি ছাড়া আর কেউ খুশি হল বলে মনে হল না। খাবার পর জল খেয়ে, পকেট থেকে একটি লোমওয়ানা ল্যাব্বেক্স বের করে

মুখে পুরে, যেই বলেছি, “আঃ! কি আরাম!”

অমনি ওরা সব রুখে উঠল, “আরাম? আরামটা কোথায় পেলি তাই বল! এখন কি উপায় হবে শুনি? সামনে অঘোর জঙ্গল, পেছনে শত্রুর, এখনি বিকেল হয়ে এসেছে, রাত হতে কতক্ষণ? কি-উপায় হবে এবার বল!

বললাম, “শ্যামাদাসকাকা যদি জঙ্গলের মধ্যে ইচ্ছে করে না চুকত, তা হলে এতক্ষণে আমরা—

এমনি সময় ঠান্দিদি হঠাৎ টেঁচিয়ে-মেঁচিয়ে এক লাফে গাড়িতে উঠে পড়ে বললেন, “ওরে বাবা রে! বাঘ!”

আমিও গাড়িতে উঠে, দরজা বন্ধ করে দিয়ে, তাকিয়ে দেখি একটা মোষ প্যাটার্নের জন্তু; বিরিকিঁদা তাড়া দিতেই চলে গেল। সত্যি, মেয়েরা যে কি দারুণ ভীতু হয়।

একটু পরেই একটা ব্যাঙ দেখলাম, থপ্ থপ্ করে কতকগুলো কালো পাখরের ফোকরের মধ্যে ঢুকে গেল। তার পর অনেকক্ষণ ধরে ফোকরের মধ্যে ব্যাঙের চোখ জল্জল্ করছে দেখতে পাচ্ছিলাম। কিছু ভয় পাই নি। ঠান্দিদিকে কিছু বলি নি পর্যন্ত। কি জানি যদি শেষটা ওঁর হাত-পা এলিয়ে যায়। মেয়েদের কিছু বলা যায় না।

খানিক বাদে বিরিকিঁদা বলল, “কই, দেখি তো মালাটা। ই-স্! লাখ টাঁকার জিনিস রে শ্যামাদাস। ধরা না পড়িস যদি, রাতারাতি রাজা হয়ে যাবি। তবে যদি ধরা পড়িস—আর সেটারই চান্স বেশি—তা হলে বাকি জীবনটা ঘানি টেনে কাটাবি।”

আমি বললাম, “হ্যাঁ, আমি দেখেছি, চোখে নারকোল মালার তৈরি চশমা বেঁধে দেয়। নইলে মাথা ঘোরে।”

অমনি শ্যামাদাসকাকা ঠাস্ করে আমার গালে একটা চড় কষিয়ে মালাটাকে টেনে ঘাসের ওপর ছুড়ে ফেলে দিল।

সবুজ ঘাসের ওপর মুক্তাগুলো জ্বলতে লাগল, যেন কে সারি সারি বাতি দিয়েছে।

বিরিঞ্চিদা গিয়ে কুড়িয়ে আনল।

দেখলাম মাঝখানে আবার একটা মস্ত হীরে ঝোলানো। শ্যামাদাস-কাকাকে ছলিয়ায় ধরলে ঠিক হত! কিন্তু তা হলে গাড়ি কে চালাত?

### তিন

চার দিকে চেয়ে দেখলাম। মাথার ওপর বটগাছটা মেঘের মতো অন্ধকার তৈরি করে রেখেছে। কতকগুলো বুঁরি মাটিতে নেমেছে, কতকগুলো শূন্যে ঝুলছে, বাতাস লেগে একটু একটু ছলছে, আর ডালের ভেতর দিয়ে, পাতার ফাঁক দিয়ে ছেঁড়া-ছেঁড়া সূর্যের আলো, কেমন একটা সবুজ রঙ ধরে আমাদের গায়ে এসে পড়ছে। শিরশির্ বাতাস বইছে।

শ্যামাদাসকাকা বিরিঞ্চিদার হাত থেকে মালাটা ছিনিয়ে নিয়ে আবার পকেটে পুরে ফেলে বলল, “এ-সব সামান্য জিনিসে আমার কোনো লোভ নেই রে বিরিঞ্চি। ও মালা আর কি দেখাচ্ছিস? জানিস আমার ঠাকুমার গায়ে ছুপুয়ে এক লাখ টাকার আর সন্ধেবেলায় তিন লাখ টাকার গয়না থাকত। এত গয়না ছিল যে নিজেই জানতেন না কি আছে না আছে। ওঁদের বাড়িতে বাইরে থেকে গয়না পরে কেউ যদি আসত, তো মনে করতেন বুঝি ওঁরই গয়না নিয়েছে! এমনি করে কত যে শত্রু তৈরি করেছিলেন। শেষটা তাতেই ওঁর কাল হল!”

আমি বললাম, “কেন, কেন, কি হয়েছিল?”

শ্যামাদাসকাকা বললে, “আঃ, গল্প বলবার সময় ছড়ো দিতে হয় না। কি রূপ ছিল তাঁর তা জানিস? ওঁর পাশে যে দাঁড়াত তাকেই বাঁদরের মতো দেখাত! ছুধের মতো রঙ, গোড়ালি পর্যন্ত কালো কৌকড়া চুল, কান পর্যন্ত টানা চোখ, মুক্তোর সারির মতো দাঁত। তিন লাখ টাকার গয়না পরে শুতে যেতেন!”

আমি বললাম, “ই—সু! তার পর কি হল? নিশ্চয় খারাপ কিছু?”

শ্রামাদাসকাকা বকে যেতে লাগল, “একদিন সকালে উঠে দেখেন সব চুরি গেছে। শত্রুরের তো আর অভাব ছিল না। রাতারাতি কে এসে গা থেকে সমস্ত খুলে নিয়ে চলে গেছে। ঠাকুরমা টেরও পান নি। সকালবেলা তাবিজ টিলে হয়ে গেছে মনে করে কনুই খামচাচ্ছেন; চেয়ে দেখেন কোথায় তাবিজ! সোনার তাবিজ নেই, হীরের রতন-চুড় হাওয়া নীলকান্তমণি বসানো চরণ-পদ্ম, ফিরোজা দেওয়া মুক্তোর সাতনরি, কিচ্ছু নেই। নাকছাবিটা অবধি খুঁটে তুলে নিয়ে গেছে।”

একটা দীর্ঘনিশ্বাস ফেলে শ্রামাদাসকাকা বলল, “আমার মন বলছে এই মালটাও সেই চুরি-করা জিনিসেরই একটা। কিছুরই ফর্দ করা তো আর ছিল না। তবে এটার কতই-বা দাম হবে? বড় জোর বিশ-পঁচিশ হাজার!”

বিরিঞ্চিদা সামনের দিকে ঝুঁকে বলল, “ছাথ শ্রামাদাস, তোর মনে পাপ ঢুকেছে; তুই খুব ভালো করেই জিনিস এটা সেই জমিদার-গিন্নির মালা। হয়তো ঐ লুঙ্গি-পরা লোকটার সঙ্গে তোর ষড়্ ছিল। দেখিস এর জন্তু তোকে বুলতে হবে।”

দেখলাম হিংসায় বিরিঞ্চিদার মুখটা সবুজ হয়ে গেছে।

শ্রামাদাসকাকাও দেখলাম দারুণ রেগে গেছে, “আমি বুলব মানে? বাঃ বেশ বললি যা হোক! তুই আর পিসিমা—”

বিরিঞ্চিদা হঠাৎ ব্যস্ত হয়ে শ্রামাদাসকাকার মুখটা চেপে ধরে নাক দিয়া আমাকে দেখিয়ে বললে, “স্-স্-স্-স্ চুপ কর ভাই! বলেছি তো তোকে চীনে হোটেলের চ্যাং-ব্যাং খাওয়াব। তা ছাড়া তোর নিজেরও তো—”

সবাই চুপ করল।

ঠান্দিদি মোষ দেখার পর আর কথা বলেন নি। এখন হঠাৎ দীর্ঘনিশ্বাস ফেলে বললেন, “হরি হে, তোমারি ইচ্ছে। নইলে আমারই-বা সেজোপিসিমার মুক্তোর মালা বাঁক থেকে বেমালাম অদৃশ্য হবে কেন। ভাবতে পারিস তোর, খাটের তলায় বাঁক, বাঁকের ওপর

সের পঁচিশেকের সাঁড়াশি বারকোশ, বাস্ত্রের মুখ মোটা ছাগলদড়ি দিয়ে বাঁধা, খাটের ওপর অষ্টপ্রহর সেজোপিসিমা শুয়ে। আমার বিয়েতে ঐ দিয়ে আশীর্বাদ করবেন বলে না খেয়ে, না ঘুমিয়ে; বছরের পর বছর মালা আগলাচ্ছেন। কবে আমার বিয়ে হবে। এদিকে আমি তখনো জন্মাই নি পর্যন্ত! শেষটা একদিন দেখেন কিনা বাস্ত্রের মুখ যেমন দড়ি দিয়ে তেমনি দড়ি দিয়েই বাঁধা; সাঁড়াশি বারকোশ যেমনকে তেমন; খালি বাস্ত্রর মধ্যে লাল চেলির টুকরোয় বাঁধা মালাগাছি নেই। সেই শোকেই তো আমি জন্মবার আগেই সেজোপিসিমা গেলেন! নইলে কি আর এমন বয়স হয়েছিল! মাত্র একাশি বছর। অথচ গুঁরই মা দিদিমারা হেসে খেলে সাতানব্বই-আটানব্বইটি বছর কাটিয়েছিলেন। হরি-নারায়ণ! এ মালাটা যেন অবিকল সেই। একরকম বলতে গেলে এটা আমারই মালা!”

বিরিঞ্চিদাও কম যায় না। সে বললে, “আমার জীবনেও কি মুক্তোর মালা নেই নাকি? জানিস, যেবার আমি প্রথম বার বি, এ, পরীক্ষা দিই, শেষদিন পরীক্ষা দিতে যাচ্ছি, দেখি সামনে এক সন্নিসী। কি করি ট্রায়াম ভাড়া ছাড়া হাতে একটি পয়সা নেই।’ তাই-ই দিয়ে দিলাম। সন্নিসী বললেন, ‘ব্যাটা তোকে পাশ করানো কারো কস্ম নয় তবে এই জিনিসটা নে, কিছুটা শান্তি পাবি।’ বলে একটা ছোট পুঁটলি দিলেন। বিকেলে বাড়ি গিয়ে খুলে দেখি ঠিক এইরকম একটা মুক্তোর মালা।”

আমি বললাম, “জ্যা। তার পর সেটার কি হল?”

বিরিঞ্চিদা বলল, “ভুগ্ধের কথা আর বলিস কেন। ভুলে সেটা সুন্ধুই জামাটা ধোপার বাড়ি দিয়েছিলাম। তা ধোপার বাড়ি থেকে একটা পেনসিল ফেরত পাওয়া যায় না, ও কি আর ফিরে আসে! ধোপা-টাও আবার পরদিন থেকে নিখোজ। হয়তো এ-সব বিশ্বাস করবি না।”

আমিও এ কথা শুনে বললাম, “ও হ্যাঁ, আমারও মনে পড়ছে—”

ওরা তিনজনেই একসঙ্গে বলে উঠল, “চোপ। ফের বানাচ্ছিস!”

ঠান্দিদি নিশ্বাস ফেলে বলে যেতে লাগলেন, “ইস, ভাবতে গিয়েও আমার পায়ের লোম খাড়া হয়ে হাঁসের পায়ের মতো হয়ে গেছে। সেবার সেই যে মেমের পালক-দেওয়া টুপি দেখে ভয় পেয়ে, চিড়িয়াখানার খাঁচা ভেঙে বাঘ বেরিয়ে এসেছিল, তোদের কারো মনে নেই? তবে মনে থাকা শক্ত, কারণ তোরা কেউ ছিলি না। সেই যে সব একতলার দরজা জানলা বন্ধ করে দৌতলায় বসে থাকতে হয়। উঃ! এখনো মনে করলে হাত-পা পেটের ভেতর সঁদোয়। তার মধ্যেও সেক্সোপিসিমা মালাগাছি প্রাণ দিয়ে রক্ষা করেছিলেন! শেষে কিনা—” বলে ঠান্দিদি চোখে আঁচল দিলেন।

শ্রামাদাসকাকা একটু যেন রাগ-রাগ ভাব করে বলল, “খামো দিকিনি। মনের দুঃখগুলো এখনকার মতো চেপে রেখে, কি করা যায় তাই ভাবা যাক!”

ঠান্দিদি বিরক্ত হয়ে বললেন, “তা শুনতে ভালো লাগবে কেন? মালাটা কি তুই সহজে হাতছাড়া করবি? বেশ, চল, যা হোক কোথাও একটা ব্যবস্থা করা যাক। ওঠ, চল।”

শ্রামাদাসকাকা বলল, “চল বললেই তো আর চলা যায় না। আসল কথা হল ও গাড়ি এখনকার মতো এক ইঞ্চিও চলবে না। ওর তেল ফুরিয়ে গেছে, ওর সব কটা টায়ার ফুটো হয়ে গেছে, তা ছাড়া কিছুক্ষণ ধরে ওর পেটের ভেতর থেকে কিরকম একটা গৌঁ গৌঁ শব্দ বেরুচ্ছে, সে আমি একেবারেই ভালো বুঝছি না।”

বিরিঞ্চিদা বেজায় চটে গেল—“ইয়ে, টায়ার সব ফুটো করে দিয়েছ? ওর দাম কত তা জানো? আর গৌঁ-গৌঁ শব্দও তো আগে ছিল না।”

শ্রামাদাসকাকা আরো বলল, “তা ছাড়া রাস্তাও তো এইখানে শেষ হয়ে গেছে, এখন উপায়টা কি হবে তাই বল।”

এই বলে তিনজনেই আমার দিকে চেয়ে রইল।

আমি বললাম, “কি আবার হবে? চল, হাঁটা দেওয়া যাক। হেঁটে গিয়ে আশ্রয় খুঁজে নেওয়া যাক। সেখানে মাথাও গৌঁজা যাবে, ফন্দিও



পাকানো যাবে।”

ঠান্দিদি চটে গেলেন।

“ফন্দি পাকানো আবার কি? কোথায় শিখিস এ-সব কথা? তা ছাড়া ঐ লাখ টাকার মালা হাতে নিয়ে, এই ভর সন্ধ্যাবেলা, অঘোর বনের মধ্যে হেঁটে বেড়াব? বেঘোরে অচেনা আস্তানায় আশ্রয় নেব? জোর প্রাণে কি একটুও দয়ামায়া নেই রে?”

বললাম, “বেশ, তা হলে হেঁটো না, গাড়িতেই বসে থাকো, ছুগুরে খেয়ে নিলে আমাকে বোলো না! তোমাদের পেছনে না ছলিয়া লেগেছে?”

এই বলে আমার দিকের দরজাটা খুলে নেমে পড়লাম।

ছলিয়ার কথা শুনেই ওরাও এ ওর পা মাড়াতে মাড়াতে ঠেলাঠেলি করে নেমে পড়ল।

উঃ! বসে থেকে থেকে হাতে পায়ে খিল ধরে গেছিল। খানিক হাত-পা সোজা-বাঁকা করে, বাবা যেমন বলেছিলেন, সেইরকম করে খিল ছাড়ালুম। ওরা অবাক হয়ে দাঁড়িয়ে দাঁড়িয়ে দেখতে লাগল। তার পর বিরিঞ্চিদা বলল, “যত ঢং! নে, নে, গাড়ির কাঁচটা চ তোলা, দরজা-গুলো এঁটে দে। আমারও যখন তখন হাতে-পায়ে খিল ধরে যায়।”

টিফিনক্যারিয়ারে দু-চারটে লুচি-টুচি যা পড়ে ছিল, পকেটে ভরে নিলাম, তার পর পেছনের জানলা দরজা বন্ধ করলাম।

তখন শ্যামাদাসকাকা বলল, “আর, হ্যাঁ, ঙ্খাখ, আমি যা ভুলো মানুষ, মালাটাও বরং তোর কাছেই রাখ, আমি আবার কোথায় হারিয়ে ফেলব।”

বলে মালাটা একরকম জোর করে আমার হাতের মধ্যে গুঁজে দিল। বেশ একটু হাসি পেল আমার।

মালা হাতে নিয়েই জানলা তুলতে লাগলাম। তারার আলোতে মুক্তাগুলো বিকমিক করতে লাগল।

হঠাৎ আমার গা শিউরে উঠল, বৃকের রক্ত হিম হয়ে গেল! যা ঘটবার নয়, তাই ঘটে গেল।

কিন্তু কেউ কিছু খেয়াল করল না। তাই আমিও শ্রেণি চেপে  
গেলাম।

### চার

সে কি ঘন বন। চার দিক থেকে অন্ধকার ঘনিয়ে আসতে।  
খোলা জায়গায় তবু চার পাশটা দেখতে পাচ্ছিলাম, এখানে তারার আলো  
পৌঁছয় না। হাজার হাজার বর্ষার জল খেয়ে খেয়ে গাছপালাগুলো অসম্ভব-  
রকম বেড়ে গিয়ে, মাথার ওপরেও আরেকটা জমাট অন্ধকার বানিয়েছে।  
তার ওপর বৃষ্টি পড়তে শুরু করেছে। সেই বৃষ্টির জল পাতা থেকে  
পাতায় ধসে, টুপ্‌টাপ করে আমাদের গায়ে মাথায় ঝরে পড়ছে। সে যে  
কি দারুণ ঠাণ্ডা ভাবা যায় না। পায়ের নীচে ঝরা পাতার গালচে  
পাতা, পায়ের শব্দ শোনা যায় না। শুধু একটা শুকনো ডালে কারো  
পা পড়লে, সেটা মর্টাৎ করে ভেঙে যাচ্ছে, আর সেই শব্দে চার দিকটা  
বনবন করে উঠেছে। আর কোনো সাড়াশব্দ নেই।

সকলের মনে দারুণ হুশিচিন্তা, বিশেষ করে আমার নিজের মনে। তার  
কারণ খানিক আগেই যে সর্বনাশটা হয়ে গেছে, সে বিষয় কাউকে কিছু  
বলবার সাহস নেই আমার।

যাই হোক, সরু বনপথ ধরে, একজনের পেছন একজন, কাছাকাছি  
ঘেঁষাঘেঁষি হয়ে চলেছি। টর্চ-ফর্চের বালাই নেই।

বেশ শীত করছে, আবার খিদে-খিদেও পাচ্ছে। পকেটের লুটির  
ঘিঙুলো অল্প জিনিসে লেগে গিয়ে, একটা জাবড়া মতো পাকিয়ে যাচ্ছে।  
ও বেশিক্ষণ রাখা ঠিক নয়।

এমনি সময় দূরে গাছের ফাঁক দিয়ে, ক্ষীণ একটু আলোর রেখা  
দেখা দিল। ব্যস, আর কি ভাবনা! তার মানে বনের মধ্যে মান্নুষের  
বাস আছে; খাবার পাওয়া যাবে, আর শোবার জায়গা পাওয়া যাবে।

অন্ধকারে পকেটে হাত পুরে দিয়ে লুটির দলাটা বের করে ক্যাচব্-

ম্যাচর করে খেয়ে ফেললাম। সে কি শব্দ রে বাবা। চার দিকের গাছপালাগুলো পর্যন্ত রী-রী করে উঠল। ওরা ব্যস্ত হয়ে বলল, “ওকি রে কি হল?”

ভাঙা গলায় বললাম, “ঐ দেখ আলো।”

তাই দেখে সবাই তো আহ্লাদে আটখানা! এতক্ষণ মুণ্ডু বুলিয়ে বুলিয়ে, পা ঘষটাতে ঘষটাতে চলেছিল, এবার তাড়াতাড়ি হাঁটা দিল। আলোটা ক্রমে কাছে আসতে লাগল।

যখন খুব কাছে পৌঁছলাম, দেখলাম একটা ফাঁকা মতো জায়গা, তার মাঝখানে ছাই রঙের প্রকাণ্ড পুরোনো বাড়ি, তার চুনবালি খসে যাচ্ছে, দরজা জানালা বুলে পড়ছে, দেয়াল ফুঁড়ে বট-অশ্বখ গাছ গজিয়েছে। তবু একটা আশ্রয় তো বটে।

সদর দরজাটা বন্ধ! জানলার ভাঙা খড়খড়ির ভেতর দিয়ে আলো দেখা যাচ্ছে। সেই আলোটুকু লম্বা হয়ে কত দূর অবধি পড়েছে।

বিরিঞ্চিদা এগিয়ে গিয়ে আস্তে আস্তে দরজায় টোকা দিল। আমরা বাকিরা ষেঁষাষেঁষি হয়ে দাঁড়িয়ে, এ ওর ঘাড়ে গরম নিশ্বাস ফেলতে লাগলাম।

কোনো সাড়াশব্দ নেই।

তখন শ্যামাদাসকাকাও আর থাকতে না পেরে, সাহস করে গিয়ে দরজাতে এমনি জোরে জোরে ধাক্কা দিতে লাগল যে আশেপাশের জানলাগুলোর ভাঙা খড়খড়িও খটখট করতে শুরু করে দিল।

আমরা ওপর দিকেও তাকাচ্ছিলাম, মনে হল খড়খড়ির ফাঁক দিয়ে কারা যেন আমাদের খুব নজর করে দেখছে। সিঁড়িটা থেকে নেমে একটু সরে দাঁড়ালাম।

অনেক ডাকাডাকি ধাক্কাধাক্কির পর শুনতে পেলাম ভারী পায়ের শব্দ। কেমন একটু ভয়-ভয় করতে লাগল। মনে হল কাজ কি আশ্রয়ে। গাড়ির মধ্যেই কোনোরকমে রাতটা কাটিয়ে সকালে যা হয় একটা কিছু করলেই হয়।

ঠিক সেই সময়ে খট করে দরজার মাঝখানে একটা ছোট্ট খোপ মতো খুলে গেল। সেই ফাঁক দিয়ে একটা কালো বুনো ভুঙ্কর নীচে থেকে একটা কালো জ্বল্জ্বলে চোখ আমাদের দিকে একদৃষ্টে তাকিয়ে রইল।

ঠান্দিদি ডেকে বললেন, “আমরা চোর ডাকাত নই গো! ক্লান্ত পথিক, জলে, ভিজ্জে, খিদেয় কাতর হয়ে, একটু আশ্রয় চাইছি। খোলোই না বাপু।”

চোখটা আস্তে আস্তে সরে গেল। তার পর কত সব ছিটকিনি নামানোর, ছড়কো সরানোর, চেন খোলার, চাবি ঘোরানোর আওয়াজ। শেষটা দরজাটা ধীরে ধীরে ফাঁক হয়ে গেল।

অমনি আমরাও ছড়মুড় করে ভেতরে ঢুকে পড়লাম।

মস্ত চারকোণা ঘর, ওবড়ো-খেবড়ো দেয়াল, অসমান টালি-ওঠা মেঝে, এক পাশে একটা ভে-পায়া টুলের ওপর তেলের বাতি জ্বলছে, তার কাছ দিয়ে পুরোনো একটা কাঠের সিঁড়ি ওপরে উঠে অন্ধকারের সঙ্গে মিশে গেছে।

ঘরের মাঝখানে দাঁড়িয়ে আছে এই তাল-চ্যাঙা, ইয়া মণ্ডামার্কি এক বুড়ি। মাথার ওপর তার বুঁটি করে চুল বাঁধা। ঘরময় ভুঙ্কর করছে খিচুড়ির গন্ধ।

আমরা এদিকে কাগ-ভেজা, গা বেয়ে জল ঝরছে, সেই জল ঘরের মেঝেতে জমা হয়ে, ছোট-ছোট পুকুর তৈরি হচ্ছে। বুড়ি হতাশভাবে সেই দিকে তাকিয়ে রইল।

ভাবলাম বোধ করি বাঙালি নয়, কথা বোঝে নি। শ্যামাদাসকাকা বলতে লাগল, “হামলুগু ছুঁছুঁ আদমি, নই। জলমে কাদামে হোঁচট থাকে থাকে—”

বুড়ি বললে, “চের হয়েছে বাছা। কিন্তু খোঁজ নেই খবর নেই হঠাৎ এত লোকের ব্যবস্থা কেমন করে হয় বলতে পারো?”

শ্যামাদাসকাকা অল্পনয় করে বলল, “কোনো ব্যবস্থা চাই না। শুধু শুকনো গামছা যদি দিতে পারেন ভালো হয়। নিদেন ছোটো ছেঁড়া

জামা দিলেও তাই দিয়ে গা মাথা মুছে নিতে পারব।”

ঠান্দিদি আবার জুড়ে দিলেন, “আমার বাছা তাও লাগবে না।  
ঐ যার তার জামা আমি মাথায় ঘষতে পারব না। কিচ্ছু দরকার নেই,  
আমার আঁচলই যথেষ্ট।”

বুড়ি ঝড়ের মতো মুখ করে আমাদের কথা শুনতে লাগল। মুখে কথা  
নেই।

ঠিক সেই সময় শুনতে পেলাম দূরে কড়া নাড়ার শব্দ। এরা তিনজন  
এমনি আঁৎকে উঠল যেন ভূত দেখেছে।

বুড়িও যেন এরই জন্তু অপেক্ষা করছিল, টুপ্ করে পেছনের দরজা  
দিয়ে বেরিয়ে গেল।

আমরা চারজন যে যার পুকুরে দাঁড়িয়ে ভাবতে লাগলাম এই জলে  
ঝড়ে আঁধার রাতে কে আবার এল!

কিন্তু ছলিয়ারা কি এমনি জানান দিয়ে আসে? তার চাইতে বোপের  
পেছন থেকে ছ—স্ করে—

কানে গেল দরজা খোলার শব্দ। কি বলব, ভাবতে পর্যন্ত ভুলে  
গেলাম! কার সঙ্গে বুড়ি চাপা গলায় কথা কইছে। তার পর সে শব্দও  
দূরে মিলিয়ে গেল; একেবারে চুপচাপ, একটা প্রজাপতির মতো জানোয়ার  
বাতির চার দিকে উড়ে বেড়াচ্ছিল, তার ডানার ঝুপ্‌ঝাপ্ অবধি কানে  
আসতে লাগল।

হঠাৎ বুড়ি ফিরে এল। দেখলাম তার হাব-ভাব একদম বদলে  
গেছে। ই কি, হাতে হাত কচলাতে কচলাতে বললে, ‘গরিবের বাড়িতে  
এমন অতিথি পাওয়া সৌভাগ্য।’ তার পর ইয়ে কি যেন বলল মনে  
পড়ছে না তো—ও হাঁ, ‘চলুন ওপরে চলুন। গরম জল দেব, গামছা  
দেব, চারজনকে চারখানা শুকনো কাপড় দেব, মাঠাকরুনকে সুন্ধু  
কাপড়ই দেব, ভয় নেই। সামান্য যা রান্না হয়েছে, দয়া করে তাই  
দিয়ে কোনোরকমে ক্ষেমা-ঘেন্না করে চালিয়ে দেবেন, অপরাধ নেবেন না,  
ইত্যাদি।

খালি খালি মনে হচ্ছিল এখানে না এলেই ছিল ভালো। তবু ওপরে গেলাম বুড়ির সঙ্গে।

ধুলোমাখা পুরোনো কাঠের সিঁড়ির ধাপে ধাপে নানারকমের আওয়াজ হয়। কত জায়গায় রেলিং নেই, কত জায়গায় কাঠে ঘুণ ধরে গেছে। ওপরে গিয়ে দেখি প্রকাণ্ড ঘর, তার দেয়ালময় কতরকম ছবি আঁকা, তার রঙ সব জলে গেছে, হরিণ মানুষ কত কি। বুড়ির হাতের তেলের বাতির আলোতে কিরকম মনে হতে লাগল তারা বুঝি নড়া-চড়া করে বেড়াচ্ছে। শীত করতে লাগল।

কাঠের মেঝেতে পুরু হয়ে ধুলো জমেছে, যেন কতকাল কেউ এ-সব ঘরে বাস করে নি। চলতে গেলে পায়ের চাপে মনে হয় ধোঁয়া উড়ছে।

তবে সামনের দিকের একটা মস্ত ঘর খানিকটা পরিষ্কার পরিচ্ছন্ন। চারটে বিশাল বিশাল তক্তাপোষ, সর্বাস্থে কারিকুরি করা, আর কোথাও কোনো আসবাব নেই। তার পাশেই স্নানের ঘর।

বুড়ি তেলের বাতিটি দেয়ালের কুলুঙ্গিতে রেখে নিজেই আমাদের জন্তু বালতি করে গরম জল এনে দিল। সাবান দিয়ে কাচা, রোদের গন্ধ লাগা চারখানা কাপড় আর গামছাও এনে দিল। ঘন বনের মধ্যে খালি পুরোনো বাড়িতে, এত আয়োজন দেখে আমরা সবাই থ।

তার ওপর ঘণ্টাখানেক বাদে, চারখানা কানা-তোলা খালায় করে থিঁচুড়ি আর মাংস এল। চমৎকার রান্না। ঠান্দিদি অবিশ্বি কিছু ছুলেন না, আমরা তিনজনেই চার খালা মেঝে দিলাম। ঠান্দিদির জন্তু একটু ছুঁখ লাগছিল, বললাম, “তা হলে কি একটু চুইং-গাম খাবে?”

চোখ বুজে বললেন, “না বাছা, ও সব মুরগির ডিম লাগানো জিনিস আমি খাই নে জন্তেই তো।”

আসলে ব্যাপার দেখে আমরা যেমনি অবাক হচ্ছিলাম, তেমনি সন্দেহও হচ্ছিল।

খাওয়া-দাওয়ার পর বুড়ি তক্তাপোষ মাজুর বিছিয়ে, চারখানি ছোট বালিস দিয়ে গেল। আমরাও তখনি যে যার শুয়ে পড়লাম। বাবা।

সারাদিনটা যা গেছে।

কিন্তু কিছুতেই আর ঘুম আসে না। ওরা তিনজন দু-একটা কথা বলবার পর চুপ হয়ে গেল, আর আমি বহুক্ষণ জেগে থেকে থেকে কতরকম যে শব্দ শুনতে লাগলাম সে আর কি বলব!

বৃষ্টি তখনো পড়ছে, ঝপ্ ঝপ্, ঝম্ ঝম্ করে পুরোনো বাড়িটার ছাদে, কোথায় একটা টিনের চালে, চার দিকের বড়-বড় গাছপালার ওপর। নীচে বুড়ি বাসন-কোসন ধুচ্ছে মাজছে। গাছের পাতার মধ্যে দিয়ে, ভাঙা খড়খড়ির ফাঁক দিয়ে ঝোড়ো হাওয়া বইছে, জলের ছাঁট ঘরে আসছে।

মনে হল থেকে থেকে গোরুর ডাকও শুনতে পাচ্ছি। শুয়ে থাকতে পাচ্ছিলাম না, ও ধারের জানলার ভাঙা খড়খড়ির ভেতর দিয়ে দেখলাম একটা টিনের সেডের নীচে একটা পিদিম জ্বলছে আর একজন নিরীহ মতো বুড়ো একটা বিষম হিংস্র আমিষখোর চেহারার গোরু ছইছে। এত রাতে গোরু দোয়ানো কিসের জন্তু ভেবে পেলাম না।

যাই হোক, বাড়িতে তা হলে অন্য লোকও আছে। কেমন যেন ভয়টা খানিকটা কেটে গেল।

জানলা থেকে যেই ফিরেছি, অমনি মনে হল আমাদের ঘরের দরজাটা আস্তে আস্তে বন্ধ হয়ে গেল।

আমার গায়ের রক্তও জল হয়ে গেল।

## পাঁচ

একটুক্কণ ঠায় দাঁড়িয়ে রইলাম, কানের মধ্যে কি একটা ঝিম্ঝিম্ শব্দ, ওগুলো ঝিঁঝিঁ পোকান নয়, রক্ত চলাচলের শব্দ। ঘরে কোনো সাড়াশব্দ নেই, কে জানে ওরা বোধ হয় সত্যি ঘুমিয়ে পড়েছে। বাইরে গাছপালার মধ্যে তখনো একটু একটু বাতাস বইছে আর অনবরত ঝিঁঝিঁঝিঁ করে বৃষ্টি পড়ছে।

মুক্কোর মালাটার কথা ভাবতেও ইচ্ছে করছিল না। যাক গে, গুটি গুটি গিয়ে শুয়ে পড়লাম। তাইতেই কিন্তু অত বড় খাটটা মড়্, মড়্, মচ্, মচ্ করে উঠল।

আশ্চর্য যে মালাটার কথা এরা একবার জিগ্গেসও করল না! একটু আগেই ভয়ে ভাবনায় মুখে কথা সরছিল না, আর এখন সব দিব্যি ঘুমুচ্ছে! আশ্চর্য!

শুয়ে শুয়ে আবতে লাগলাম কি অদ্ভুত লোক এরা। কলকাতা ছেড়ে তো সহজে এক পা নড়তে চায় না, আর আজ কেমন সাত সকালে রওনা!

আস্তে আস্তে পকেট থেকে একটু চুইং-গাম বের করলাম! অমনি মোড়কের কাগজটা এমনি সাংঘাতিক জোরে খড়্ মড়্ করে উঠল যে নিজেই দারুণ চমকে গেলাম। এক টুকরো মুখে দিয়ে বাকিটা খুব সাবধানে পকেটে পুরলাম। ইস্, লুচিগুলোর ঘিতে পকেটটা কি বিক্রী হয়ে আছে। হাতটি বের করে মাথায় মুছে ফেললাম।

হঠাৎ মনে হল হুলিয়ার কথা! ঝেড়ে ফেলা গেছে তো? নাকি গুঁকে গুঁকে হালুম-হালুম করতে করতে এখানেও হানা দেবে। ভয়ের চোটে চুইং-গামটা প্রায় গিলেই ফেলছিলাম, অনেক কষ্টে জিব দিয়ে চিপ্কে ধরে, দাঁতের পেছনে গুঁজে দিলাম। বাবা, আমার সারা রাতের আহার! একটু বাদেই চিনিটা উঠে যাবে, তখন বেশ টেনে টেনে লম্বা করা যাবে! গিলে ফেললেই হয়েছিল আর কি।

আচ্ছা, হুলিয়া ওদের সন্ধান পেল কি করে? বিরিঞ্চিদা নাহয় পাশের বাড়িতে থাকে, কিন্তু শ্যামাদাসকাকাদের বাড়ি তো শ্যামবাজারে।

আশ্চর্য! মেলা টাকা বিরিঞ্চিদার, এই বড় বাড়ি, এই গাড়িটা, আর কি চাল! ওর চাকর নাকি ওর জুতো খুলে দেয়! কিন্তু গাড়ি চালাতে পারে না। কবে একবার নাকি পুলিশ চাপা দিয়ে থানায়-টানায় গিয়ে একাকার! শ্যামাদাসকাকা দারুণ ভালো গাড়ি চালায়, ভেতরকার সব কলকজা জানে।



তবে ছেলোবেলা থেকেই আমার সঙ্গে তেমন সম্ভাব নেই।

এই-সব ভাবতে ভাবতে ঘুম এসে গেল, চোখ বন্ধ হয়ে আসতে লাগল, কানের মধ্যে রক্তচলাচলের শব্দ, বৃষ্টির শব্দ, জঙ্গলের শব্দ সব দূরে সরে যেতে লাগল ; প্রায় ঘুমিয়েই পড়েছিলাম।

এমন সময় কাঠের সিঁড়ি আস্তে আস্তে কাঁচা-কোঁচ মটমট করে উঠল। তক্ষুনি আমার ঘুম একেবারে ছুটে গেল। একদম সজাগ হয়ে গেলাম। ছোটবেলা থেকে আজ পর্যন্ত যত চোর ডাকাতির গল্প পড়েছি, মনের মধ্যে দিয়ে একের পর এক সব পাস্ করে গেল। চোখটা একটু ফাঁক করে দরজার দিকে চেয়ে রইলাম।

ঠান্দিদি আর বিরিক্দিদা যেমন চুপ করে শুয়েছিল, তেমনি রইল। শুধু শ্যামাদাসকাকা দেওয়ালের দিকে ফিরে ঘড়্ ঘড়্ করে নাক ডাকাতে লাগল। তাহঁতে বুঝলাম সে জেগে আছে।

পায়ের শব্দ সিঁড়ির ওপরে এসে থেমে গেল। দরজাটা আস্তে আস্তে একটুখানি খুলে গেল, অল্প একটু আলো লম্বা কাঠির মতো হয়ে ঘরে এসে পড়ল। আপনা থেকেই আমার নিশ্বাস বন্ধ হয়ে এল। ক্ষীণ আলোতে পরিষ্কার দেখতে পেলাম দাঁড়িওয়াল গোরু দোয়ানো শেষ করে মুখে রুমাল বেঁধে ছদ্মবেশ ধরেছে। হাতে একটা কালো কাগজ জড়ানো লঠন উঁচু করে ধরেছে। তার সঙ্গে লেপেট দাঁড়িয়ে আছে সেই মাকড়্-পরা লোকটা, তারও মুখে রুমাল বাঁধা! এক হাতে লিক্লিকে ছোরামতন কিছু নিয়ে, একদৃষ্টিতে আমাদের চারজনের মুখ দেখছে! আই বাপ্!

অনেকক্ষণ দেখে নিশ্চয় মনে করল সবাই ঘুমিয়ে পড়েছে, তখন আস্তে আস্তে ঢুকে শ্যামাদাসকাকার পাশে দাঁড়াল। ভাবলাম, তা হলে শ্যামাদাসকাকার এইখানেই শেষ! ছোটবেলা থেকে আজ অবধি শ্যামাদাসকাকা আমাকে কত বকুনি খাইয়েছে, অপমান অপদস্থ করেছে, বোকা বানিয়েছে, ঠেঙিয়েছে পর্যন্ত—সব ক্ষমা করে দিলাম।

শ্যামাদাসকাকা তখনো এক মনে নাক ডাকাচ্ছে। মাকড়্-পরা

লোকটা তাকে মাথা থেকে পা পর্যন্ত সার্চ করল। মালা পেল না। পায় কখনো? তার পর ওকে ছেড়ে বিরিকিদার কাছে গেল। অমনি শ্যামাদাসকাকার নাক ডাকানি বন্ধ হয়ে, বিরিকিদার নাকডাকা শুরু হল। তাকেও সার্চ করা হল। মালা পাওয়া গেল না। কি করে পাবে?

তখন দাড়িওয়লা গিয়ে বুড়িকে ডেকে এনে, ঠান্দিদিকে সার্চ করাল। মালা পেল না। মনে হয় ঠান্দিদি সত্যি মুছে গেছেন। ততক্ষণে মাকড়ি-পরা আমাকে সার্চ করেছে, আমিও সমানে নাক ডেকেছি। কোথায় পাবে মালা? হতাশ হয়ে এ গুর মুখের দিকে চাইতে চাইতে তখন গেল সব দরজা দিয়ে বেরিয়ে। আলোর রেখা নিলিয়ে গেল। সিঁড়িটা একবার ক্যাচকোঁচ করে উঠল। তার পর সব চুপচাপ।

বাইরে তখন বৃষ্টি থেমে গেছে। ছাদ থেকে, গাছে পাতা থেকে টিপ্-টাপ্ জল ঝরছে; এমন-কি, একটা ভিজে ছতুমপাঁচা পর্যন্ত ডাকতে শুরু করে দিয়েছে। আমার তখনো বুক টিপ্-টিপ্ করছে; চোখ থেকে ঘুম বিদায় নিয়েছে।

অনেকক্ষণ বাদে বিরিকিদা ফিস্ফিস্ করে শ্যামাদাসকাকে বলল, “নিমেষের মধ্যে কোথায় লুকুলি?”

শ্যামাদাসকাকা চমকে উঠে বলল, “লুকুই নি তো, গুপীকে রাখতে দিয়েছি। এই গুপে, কোথায় রেখেছিল?”

আমি চুপ করে রইলাম! কি আর বলব?

শ্যামাদাসকাকা তো দারণ বিরক্ত।

“বড় যে চুপ করে আছিস? মালা যখন আমাকেই দিয়েছিল ওটা তখন আমারই। দে বলছি মালা। যাক, এখন আর আমার কোনো ভাবনাই রইল না। যেই-না সকাল হবে, মালা নিয়ে হেঁটে রেলস্টেশনে চলে যাব। তার পর সটান কলকাতা। মালা দে, গুপে।”

ঠান্দিদি বললেন, “তোমার মালা মানে? জমিদার-গিন্নির মালা বল। চোরাই মাল বল। যা না কলকাতা, তারপর আমি তোমার কি করি

দেখিস।”

শ্যামাদাসকাকা কোনো উত্তর না দিয়ে আমাকে একটা ঠেলা দিয়ে বললে, “এই গুপে, মালা বের কর বলছি”

আমি বললাম, “মালা আমার কাছে নেই, দেন কোথেকে?”

বিরিঞ্চিদা বললে, “নেই মানে? ভালো চাস তো দিয়ে দে।”

ফের বললাম, “বলছি আমার কাছে নেই। খুঁজে দেখতে পারো।”

তখন ওরা করল কি, রেগে-মেগে উঠে এসে সত্যি সত্যি আমাকে আরেকবার সার্চ করল। তার পর দেশলাই জ্বলে সারা ঘরময় খুঁজে বেড়াল।

যখন বিরিঞ্চিদার দেশলাই বাস্তু খালি হয়ে গেল, তখন শ্যামাদাস-কাকা পকেটে হাত দিল নিজেরটা বের করবার জন্ত।

পকেটে হাত দিয়েই দারুণ আঁৎকে উঠে বলল, “বিরিঞ্চি আমার পকেটে একবার হাত দিয়ে দেখ তো, যা মনে হল তা সত্যি কি না।”

বিরিঞ্চিদা তখন শ্যামাদাসকাকার পকেটেহাত পুরে টেনে বের করে আনল এক ছড়া মুক্তোর মালা। দেশলাই-এর ফাঁগ আলোতে অন্ধকারের মধ্যে সেটা তারার মতো জ্বলতে লাগল।

আমি ভাবলাম, আমি কি জেগে আছি, না স্বপ্ন দেখছি। ওখানে কেমন করে মালা থাকা সম্ভব হয়? হাত-পা ঠাণ্ডা হয়ে গেল! শুকনো গলায় বললাম, “দেখি দেখি।”

ততক্ষণে মেঘ কেটে গিয়ে ঘরের মধ্যে চাঁদের আলো এসেছে। সেই আলোতে বিরিঞ্চিদা মালাখানি তুলে ধরল। ইস্, সত্যি চোখ বাসে যায়।

আমি তো জানি শ্যামাদাসকাকার পকেটে মালা থাকতে পারে না, নিজের চোখকে বিশ্বাস করতে পারছিলাম না। উঠে কাছে গিয়ে দেখলাম সেইরকমই মালা বটে। কিন্তু যেন ঠিক সেই মালা নয়। তার মাঝ-খানকার খামিতে যেন মস্ত হীরে ছিল, এর মাঝে একটা ফিকে নীল পাথর বসানো।

বার বার বলতে লাগলাম, এ সে মালা নয়। সে মালা এ হতেই পারে না।

শ্যামাদাসকাকা শেষপর্যন্ত বিরক্ত হয়ে গেল—“বেশ তো। তা হলে সেটাও বের করে দে। ভালোই তো, আমার দু ছুটো মালা হল। দে শিগ্গির সেটা।”

কি আর করা, চুপ করে রইলাম। একটু চুইং-গাম ছিঁড়ে মুখে দিলাম।

ঠান্দিদি তখন বললেন, “পুজো-আচ্ছা তো আর করবি নে তোরা, হবেই এরকম। বিরিকিটার তো এতদূর সাহস যে বলে ঠাকুর দেবতা—”

বিরিকিটা বাধা দিয়ে বলল, “আহা এর মধ্যে আর ও-সব টেনে আনা কেন?”

ঠান্দিদি তবু বলতে লাগলেন, “কিছুতে যে আমাদের পাছু নিয়েছে, এটা তো ঠিক। তাই সমস্ত ব্যবস্থা করেও পৌঁছুতে পারলাম না। এখন কি হয় কে জানে!”

শ্যামাদাসকাকা আর বিরিকিটা ব্যস্ত হয়ে উঠল।

“কি হয় কে জানে আবার কি কথা! আরো বহুদূর যেতে হবে। নইলে পার পাওয়া নেই। মোটরে না হোক ট্রেনে। ট্রেনে না হোক গোরুর গাড়িতে। নয় তো হেঁটে। যেমন করেই হোক অনেক দূরে চলে যেতেই হবে!”

শিউরে উঠে ছুজনেই বার বার বলতে লাগল। ঢের দূরে। আরো ঢের ঢের দূরে।

অবাক হয়ে ভাবলাম ছলিয়াটা কি সাংঘাতিক রে বাবা। শুঁকে শুঁকে এখানেও! আস্তে আস্তে চাঁদ ডুবে গেল! আবছা অন্ধকারে ঘরে ভরে থাকল। তারো অনেক পরে কাগরা ডাকল।

## ছয়

সকাল হয়েছে বলে জীবনে এই বোধ হয় প্রথম খুশি হলাম। নইলে অল্প দিন তো প্রায় রোজই আমাকে ঠ্যাং ধরে টেনে খাট থেকে নামাতে হয়। শুধু যে মাজন-টাঁজন নেই বলে দাঁত মাজতে হবে না তা নয়, উঠে দেখি রাতের ভয়-ভাবনাগুলো দিনের আলোতে দিব্যি মেঘের মতো কেটে গেছে। তবে থেকে থেকে খালি খালি মনে হতে লাগল, তবে কি শ্যামাদাসকাকা ভেলকি জানে? মালা এল কোথেকে? এটা যে সে মালা হতেই পারে না, সে কথা আর কেউ না জানুক আমি তো জানি।

জানলা দিয়ে চেয়ে দেখি শেষটি সত্যি সত্যি সূর্য উঠেছে। বৃষ্টির জলে ধোয়া গাছের পাতায় পাতায় আলো লেগেছে। গাছের মাঝে মাঝে ঝোলানো বিশাল আটকোনা সব মাকড়সার জাল রোদ লেগে বিক্মিক করছে।

নীচে থেকে শুনলাম গোরুটা যেন খুশি হয়ে ডাকছে, কিছু পেয়েছে-টেয়েছে হয়তো। ঘরের মধ্যে চেয়ে দেখি রাত জাগার পর ওরা তিনজনেই অঘোরে ঘুমুচ্ছে।

কি নিয়ে যে ওদের এত ভাবনা ভেবেই পেলাম না। অল্প সময় তো বিরিঞ্চিদার মুখ দেখলেই ঠান্দিদির পিত্তি জ্বলে যায়, যা খুশি তাই বলেন। আর শ্যামাদাসকাকাকে পেলো বিরিঞ্চিদাকে ছড়ে ওকে আগে ধরেন। আর এখন সারাদিন এক গাড়িতে, সারারাত এক ঘরে, অথচ একটা রাগের কথা নেই! এ ভাবা যায় না।

দেখতে দেখতে রোদে ঘর ভরে গেল, ওদের মুখে রোদ পড়ল। বাইরের পাখিরাও মহা গোলমাল শুরু করে দিল। একে একে ওরা সব উঠে বসল। চোখে নীচে কালি, বড়রা যেমন সকালবেলা চা না গেলে বিরক্ত হয়ে, যায়, তেমনি মুখ করে সব কিছুক্ষণ বসে রইল। তার পর উঠে মুখ-টুক ধুয়ে তবে কথা বলতে লাগল।

যতই কথা বলে, মনের স্ফূর্তিও দেখি ততই বেড়ে যায়। ঠান্দিদি

বিরিঞ্চিদাকে বললেন, “যাক, তা হলে বোধ হয় তোর আর কোনো ভাবনা—”

বিরিঞ্চিদা আমার দিকে চেয়ে বলল, “স্-স্-স্।”

আবার একটু বাদেই বিরিঞ্চিদা খুশি হয়ে শ্যামাদাসকাকাকে বলল, “কে জানে, বোধ হয় মরে নি, এমনও তো হতে পারে।”

শ্যামাদাসকাকা ভীষণ চমকে উঠে বলল, “চোপ, ইডিয়ট।”

মনে হল রাতের বিপদ কেটে যাওয়াতে ওরা সব অসাবধান হয়ে পড়েছে। হাসি পেল। এমনি সময় জঙ্গলের ভিতর দিয়ে মনে হল মেলা লোকজন আসছে।

জানলার কাছে গিয়ে বাইরে চেয়ে দেখে বললাম, “যাক, আর আমাদের কোনো ভয় নেই! পাঁচ সাতজন পুলিশ-টুলিশ এসে পড়েছে।

যেই-না বলা অমনি ঠান্দিদি আর শ্যামাদাসকাকা হুড়মুড় করে গিয়ে স্নানের ঘরে ঢুকল।

আমি আরো ভালো করে তাকিয়ে দেখে, ওদের সাহস দেবার জন্ম ডেকে বললাম, “কোথায় যাচ্ছ? বলছি না কোনো ভয় নেই। ঐ তো ওদের সঙ্গে সেজদাদামশাই, বিরিঞ্চিদার পিসেমশাই সবাই রয়েছেন।”

ওমা, অমনি বিরিঞ্চিদাও পড়িমরি করে ছুটে স্নানের ঘরে ঢুকে ভেতর থেকে ছিটকিনি তুলে দিল।

আমি তো প্রায় মুছেছা যাই আর কি! মনে হল তবে নিশ্চয় আমারও গা ঢাকা দেওয়া উচিত। স্নানের ঘরের দরজায় কত ধাক্কাধাক্কি পেড়াপীড়ি করলাম, কোনো ফল হল না।

শেষ অবধি আর কিছু ভেবে না পেয়ে, জুতো পায়ে দিয়ে খাটের তলায় গিয়ে চুকলাম। আমার নতুন জুতো রে বাবা, কি দরকার ফেলে রেখে।

ততক্ষণে ওরাও সিঁড়ি দিয়ে উঠতে আরম্ভ করেছে। আধ মিনিট বাদে দরজায় টোকা।

আমি একেবারে চূপ।

হেঁড়ে গলায় কে ডেকে বললে, “ভবিষ্যতে যদি ভালো চান তো বন্দুক-টন্দুক যা সঙ্গে আছে দরজার বাইরে ফেলে দিন। আর নিজেরা মাথার উপরে হাত তুলে দরজার দিকে মুখ করে সারি সারি দাঁড়িয়ে যান।”

আমি নিশ্বাস বন্ধ করে চূপচাপ পড়ে থাকলাম। তার পর আরো মোটা গলায় কে বললে, “দেখুন, যা হবার তা হয়ে গেছে, আর কেন অপরাধ বাড়াচ্ছেন? নিজেদের ভালোর জন্ত বেরিয়ে আসুন।”

আমি যেমন শুয়েছিলাম তেমনি রইলাম।

এবার বিরিক্শিদার পিসেমশাই নিজেই রেগে-মেগে চেষ্টা করে বললেন, কি বললেন সবটা বোঝা গেল না, বেশ ইয়ে-টিয়েই বললেন, তার মোটামুটি মানে দাঁড়ায়—ছাখ বিরিক্শি, কি ভেবেছিস তুই? যা ইচ্ছে তাই করবি আর পার পেয়ে যাবি? ভালো চাস তো দরজা খোল।

কে জানি আবার একটু দূর থেকে বলল, “দরজাটা ভেঙে ফেলুন না, মশাই!”

পিসেমশাই বললেন, “হ্যাঁ, তাই করি আর গোলা খেয়ে আমার মুণ্ডটাই উড়ে যাক আর কি!”

পেছন থেকে সেজদাদামশাই বললেন, “কেন বাবা, তোমরা সরকারের মাইনে খাও, তোমরাই দরজা ভাঙনা কেন! তা ছাড়া তোমরা মরে-টরে গেলে তো পেনসিল পাবে, তোমাদের আবার অত ভয় किसের?”

এমন কথা শুনে পুলিশরা প্রথমটা চূপ। তার পর পাঁচসাত জনা মিলে গলা খাঁকরে, বুট ঘষে, লাঠি ঠুকে, খুব আওয়াজ-টাওয়াজ করে, ভয় দেখাবার চেষ্টা করতে লাগল। এমনি সময় একতলা থেকে বুড়ি এসে হাজির। আধ সিঁড়ি উঠেই, হাঁপাতে হাঁপাতে চেষ্টা করে বলল, “ওমা, কি সব বীরপুরুষ গো! দরজার তো ভেতরকার ছিটকিনিই লাগে না।”

আর কি, হুড়মুড়িয়ে সব ভেতরে এল। এসে দেখে ভেঁা, কেউ

কোথাও নেই। একি সত্যি ভেঙ্কি নাকি? অতগুলো লোক গেল কোথায়?

ঠ্যাং দেখে বুঝলাম, দাঁড়িওয়াল লোকটা, কানে মাকড়ি ছেলে, বুড়ি সব আছে। স্নানের ঘরের দরজার দিকে চোখ পড়তে সবাই মিলে মহা গোলমাল শুরু করে দিয়েছে। এবার দরজা যে সত্যি বন্ধ সে বিষয়ে কোনোই সন্দেহ নেই।

আমারও হাত-পা পেটে সঁদিয়েছে। দরজা খুললেই কি কাণ্ডটা না জানি হবে।

এ ঘরটা খালি দেখে ভারি সাহস বেড়ে গেছে ওদের ছু-চারটে বণ্ডা লোক ছু-চারবার ধাক্কা দিতেই মরচে ধরা কজা ভেঙে দরজা গেল খুলে।

আমার বুক টিপ্‌টিপ্‌ করতে লাগল। এবার ঠান্দিদি টেরটা পাবেন! ভেবে খুব খারাপ লাগল না। কিন্তু এমন অস্বাভাবিক রকমের চুপচাপ কেন?

নিজের বিপদের কথা ভুলে গিয়ে, খাটের তলা থেকে মুণ্ডু বের করে দেখতে চেষ্টা করলাম ব্যাপারটা কি।

গায়ের রক্ত হিম হয়ে গেল। স্নানের ঘরে কেউ নেই! এইমাত্র তিন তিনটে খেড়ে লোককে ঢুকতে দেখলাম আর এখন দেখি কেউ কোথাও নেই! ওদিকে ঘরে আরেকটা দরজা নেই যে পালাবে। একটা ছোট্ট জানলা আছে বটে, তাও মাটি থেকে দশ ফুট উঁচুতে, আবার মোটা-মোটা গরাদ লাগানো। তা ছাড়া সে-সব খুলে ফেললেও বেড়াল-টেড়াল ছাড়া অন্য কিছু গলবে না সেখান দিয়ে।

এমনি আশ্চর্য হয়ে গেছলাম যে মুণ্ডুটা টেনে খাটের তলায় নিয়ে যেতে ভুলেই গেছলাম!

আর যায় কোথায়! একটা এই মোটা পুলিশ, কথা নেই বার্তা নেই, অমনি আমার ছু কান হিড়্‌হিড়্‌ করে টেনে বাইরে নিয়ে এল। আমি প্রাণপণ খাটের পায়া ঝাঁকড়ে ধরলাম, কিন্তু তাতে কোনো



সুবিধে হল না !

তখন সবাই মিলে আমাকে নিয়ে সে যে কি লাগিয়ে দিল সে আর বলার নয়। আমি তো ভেবেছিলাম টানাটানির চোটে এই ছিঁড়েই গেলাম আর কি ! এত করে ব্যাপারটা বুঝিয়ে বলার চেষ্টা করলাম, তা কে কার কথা শোনে ! বিরিক্খিদার পিসেমশায় আর সেজদাদামশায় যে কি খারাপ কথা বলতে পারেন !

বার বার বললাম, “আমি কি জানি ! স্পষ্ট দেখলাম তিনজনে ছড়মুড় করে গিয়ে স্নানের ঘরে ঢুকে দরজা এঁটে দিল, এখন নেই বললে তো আর হবে না। নিশ্চয়ই আছে ঐখানেই কোথাও, ভালো করে খুঁজলেই বেরিয়ে পড়বে। আর না-ই যদি থাকে, সেও কি আমার দোষ ? যাবে আবার কোথায়, খুঁজে দেখ না, নিশ্চয় পাবে।”

সেজদাদামশায়ের সে কি রাগ। বাবার বিষয় পর্যন্ত কি সব বলতে লাগলেন। শেষ অবধি একটা পুলিশের কাছে আমাকে জিম্মা করে দিয়ে সবাই মিলে বিষম খোঁজখুঁজি শুরু করে দিল।

প্রথমটা তো সেখান থেকে ওরা নড়তেই চায় না, বারে বারে আমাকে জিগ্গেস করে লোক তিনটেকে কি করেছি।

শেষে বললাম, “খায়ো—”

রাগের সময় আমার কিরকম হিন্দী বেরিয়ে যায়—বললাম, “যদি গিলেই ফেলে থাকি, তবু স্নানের ঘরের দরজাটা ভেতর থেকে কেমন করে বন্ধ করলাম বলতে পার ?”

তাই শুনে ওরা খানিকটা মুখ চাওয়া-চাওয়ি করে নিয়ে শেষটা খানা-তল্লাসি আরম্ভ করে দিল। সেজদাদামশাই আর পিসেমশাইও ওদের সঙ্গে চললেন ; সবাইকে দেখিয়ে দেখিয়ে আমার সঙ্গে কথা বললেন না। আমার তো তাতে কলাও হল না।

## সাত

চুপ করে তক্তাপোষের ওপর পা ঝুলিয়ে বসে থাকলাম। একটু বাদেই একটা খোঁট্টা পুলিশ মহা চোঁচামেচি লাগাল।

“আরে একঠো কো তো মিল গিয়া। কিন্তু বাকি সব কাঁহা গিয়া কুছ পাত্তা ভি তো পাই না রে বাবা!”

কাকে পেল দেখবার জন্ত দরজার কাছে গেলাম, পুলিশটাও সঙ্গে গেল। দেখি কিনা কোথেকে রোগা চিম্ড়ে একটা লোককে, সার্টের কলার ধরে ঝোলাতে ঝোলাতে ওপরে নিয়ে এল। এ আবার কে রে বাবা!

লোকটাকে তক্তাপোষের ওপর ফেলে, হাত ঝাড়তে ঝাড়তে বলল, “পিছু কা সিঁড়ি থেকে ভাগনে লাগা। ঔর হাম ভি বাথকা মার্কিক উস্কো ঘাড়মে লাফায়া।”

লোকটার দেখলাম চোখ ঠিকরে বেরিয়ে আসছে, এক পাটি চটি কোথায় খুলে পড়ে গেছে তার ঠিকানা নেই, খোঁচা-খোঁচা দাড়ি গৌফ মুখ ভর্তি, উস্কা-খুস্কা চুল।

ব্যস্ত হয়ে বললাম “আরে, এ আবার কিস্কো আনলি রে? ই তো ভুল আদমি হ্যায়।”

তাই শুনে পুলিশ ছটোই রেগে বললে, “হ্যাঁ, ভুল আদমি হ্যায় না তোমরা মুঞ্জ হ্যায়। নিশ্চয়ই তোমরা দল কা আদমি হ্যায়, তুম গোপন করতা।”

বললাম, “নিজেই বখন ধরা পড়েছি, ওদের গোপন করে আর কি লাভ হবে?”

কিছুতেই বুঝতে চায় না, শেষে বলে কিনা, “দাড়ি গৌফ লাগাতে ছদ্মবেশ পাকড়া কিনা, ঐ আস্তে তুমি চিনতে নেই পারতা।”

ভালো রে মজা।

এতক্ষণ লোকটার মুখে একটি কথা নেই। নিমেঘের মধ্যে পুলিশ ছটো ওর ঠ্যাং-ঠ্যাং দড়ি দিয়ে তক্তাপোষের পায়ার সঙ্গে বেঁধে, বেচারীকে

তক্তাপোষের একেবারে ধারে বসিয়ে, হাত দুটোকেও আবার পাছমোড়া করে কষে বেঁধে দিল। দেখলাম লোকটা বার বার কি যেন বলবার চেষ্টা করছে, তাতেই আবার ওর মুখের মধ্যে ওদের একজনের পাগড়ি থেকে এক টুকরো ছিঁড়ে নিয়ে, ঠুসে দিল।

তার পর নিজেদের হাত-পা বেড়ে, কপালের ঘাম মুছতে মুছতে বলল, “আই বাপস্! কি দারুণ গুপ্তা হ্যায়! কোই দাগী বদমাস হোগা জরুর। উঃফ্ আলজিবভি শুকিয়ে খটখটে হো গিয়া!” বলে, বিড়ি খাবার জন্ম বাইরে চলে গেল।

আমি তখন উঠে লোকটাকে ভালো করে দেখবার জন্ম কাছে গেলাম। লিক্‌পিকে হাত-পা, পঞ্চাশ-টঞ্চাশ বয়স হবে মনে হল, নিদেন চল্লিশ-টল্লিশ তো নিশ্চয়, কানে খুব লম্বা-লম্বা চুল। বড্ড মায়্যা লাগল।

আমাকে কাছে আসতে দেখে হাত-পা নিয়ে কিল্‌বিল্‌ করে সে বলল, “এ-গ্-গ্-প্-গ্-প্।”

ভারি অসোয়াস্তি বোধ করতে লাগলাম। ততক্ষণে লোকটার মুখ-চুঁটুখ লাল হয়ে উঠেছে, সে আবার অনুন্নয়-বিনয় করে বলল, “প্-গ্-গ্-গ্-গ্-ব্-গ্-গ্।”

আমি তো অপ্রস্তুতের একশেষ! দরজার কাছে গেছি পুলিশ দুটোকে ডাকতে, যদি তারা কিছু করতে পারে। লোকটা কিন্তু তাই নিদেখে, মাটিতে পায়ের গোড়ালি ঘষে রেগে রেগে বলল, “শ্-শ্-শ্-শ্-শ্!”

যাক গে, ঠিক সেই সময় পুলিশরা ফিরে আসতে হাঁপ ছেড়ে বাঁচলাম।

ওদিকে যারা খানাতল্লাশি করছিল, তাদের একটু-আধটু শব্দও আমার কানে আসছিল। বোধ হয় কেউ কেউ খুঁজতে খুঁজতে রান্নাঘরেও গিয়ে থাকবে। কিন্তু তারা তক্ষুনি রান্নাঘর থেকে বেরিয়েও এল শুনলাম, বুড়ির গলাও শুনলাম, মনে হল খুব খুশি হয় নি।

ছড়দাড় করে তিন-চারজন সিঁড়ি দিয়ে উঠে আমাদেরই ঘরে আশ্রয় খুঁজল, পেছন পেছন বুড়িও একটা গরম খুন্তি নিয়ে বকবক করতে

করতে ছুটে এল।

ঘরে ঢুকে হাত-পা বাঁধা আধাবয়সী লোকটাকে দেখে বুড়ি তো একেবারে! হাত থেকে খুন্তিটা বন্বান্ করে মাটিতে পড়ে গেল। আর অমনি পুলিশদের মধ্যে একজন সেটাকে কুড়িয়ে নিয়ে জানলা দিয়ে গলিয়ে একতলায় ফেলে দিল। এইরকম উপস্থিত বুদ্ধি দিয়েই ওরা চোর ধরে।

বুড়ির হাত-পা কাঁপছে, মুখটা লাল হয়ে উঠেছে। লোকটার দিকে একদৃষ্টে চেয়ে আছে তো চেয়েই আছে!—লোকটাও ঢোক গিলতে গিয়ে, খানিকটা পাগড়ি গিলে কেশে-টেশে একাকার।

পুলিশরা এগিয়ে এসে বুড়িকে সাবধান করে দিল, “আরে, মাইজি, বেশি কাছে মৎ যাইয়ে, বড়া বদমাস হায়।”

বুড়ি চোখ লাল করে, চাঁপা গলায় বললে, “সে কি তোমাদের কাছে শিখতে হবে নাকি। এতকাল ঘর করছি আমি জানি না!”

বলে কাছে গিয়ে কোমরে হাত দিয়ে দাঁড়িয়ে, বললে, “বেশ হয়েছে, ঠিক হয়েছে, উচিত সাজা হয়েছে! খুব খুশি হয়েছি।”

লোকটা নরম সুরে ইনিয়ে-বিনিয়ে বললে, “ল-ল-ল-ম্-ম্!”

বুড়ি দাঁতে দাঁতে ঘষে, কোনো কথা না বলে আবার নীচে চলে গেল।

পুলিশরা হাঁ করে পরস্পরের দিকে চাওয়া-চাওয়ি করে, বলাবলি করতে লাগল, “আরে বাপ্পা! ই তো ভীষণ মাইজি হো।”

তার পর বোকার মতো এ ওর দিকে তাকাতে লাগল, লোকটাকে নিয়ে কি যে করা উচিত ভেবে পেল না।

এই-সব ব্যাপার নিয়ে ব্যস্ত থাকতে এতক্ষণ নিজের বিপদের কথা ভুলেই গেছলাম। এইবার ভাবনা-চিন্তায় মনটা আবার ভারী হয়ে উঠল। খিদেও পেয়েছিল দারুণ। বুড়ির হাতের গরম খুন্তিটা দেখে অবধি জিবে জল আসছিল! তবে খাবার-দাবার সম্বন্ধে আমি কাউকে বিশ্বাস করি না, নিজের কাছে সর্বদা এক স্টক রাখি। কালকের সব জামাটামা এতক্ষণে শুকিয়ে গেছে, তার পকেট থেকে একটু চুইং-গাম

বের করতে যাব, ওমা, পুলিশগুলো অমনি হাঁই হাঁই করে ছুটে এসে বলে কি না, “খবরদার! ছুরি-ছোরা বার করোগা তো ডাণ্ডা দেকে মুণ্ডু উড়িয়ে দেগা!”

সাহস দেখে হাসি পেল। বুঝিয়ে বললাম “আরে বাবা, ছুরি-ছোরা সঙ্গে থাকলে কি আর এতক্ষণ এখানে বসে থাকি! ওটা আমার খবার!”

কিছুতেই বিশ্বাস করতে চায় না। শেষপর্যন্ত সবাইকে একটু একটু দিয়ে তবে রেহাই পেলাম। পকেটে তো প্রায় গড়ের মাঠ! ওরা দেখলাম কচ্ কচ্ করে চিবিয়ে, রবার-টবার সব গিলে ফেলে, বিরস বদন করে বসে থাকল।

এদিকে সময় আর কাটতে চায় না। বাইরে চনচনে রোদ, মনে হচ্ছে বেলা এগারোটাও হতে পারে, বারোটাও হতে পারে। স্কুলের দিনে এর কত আগে আমি খাই।

অথচ এখন অবধি অত্র লোকগুলোর কোনো সাড়াশব্দই নেই। বাড়ি ছেড়ে তারা যে জঙ্গলের মধ্যে তোলপাড় করছে, সে বিষয় কোনো সন্দেহ নেই।

ভেধে অবাক হচ্ছি বিরিকিদারা তা হলে গেল কোথায়। শেষটা ছলিয়াতে খেয়ে নেয় নি তো!

এমনি সময় পুলিশের একজন আমার কাছে এসে, পিঠে হাত-টাত বুলিয়ে হাসি-হাসি মুখ করে বলতে লাগল, “আরে ভাই, বোলো না ওলোককো কাঁহা গুন্ম কিয়া! তোমকো লজেঞ্চু দেগা, লাঠি দেগা, লাট্টু দেগা—”

এত এত ঘুষ দেখাতে লাগল, এমনি খারাপ!

হঠাৎ বাড়ের মতো দাড়িওয়াল বড়োটা এসে ঘরে ঢুকল। হাত-পা বাঁধা লোকটাকে দেখে রেগে-মেগে পুলিশদের বলল, “স্টুপিড্ কাঁহিকা; চোর ধরতে সব দেখছি সমান গুস্তাদ। আবার আমাদের কর্তাবাবুকে ধরে এনে বেঁধে রাখা হয়েছে। এরজন্তে এক-একটাকে যদি কুড়ি বছর করে জেলে যেতে না হয় তো কি বলেছি। আর কর্তামশাইকেই

জ্বলে দিবি তো আমার বাকি মাইনেটা কি তোরা দিবি না কে দেবে শুনি !”

পুলিশদের আর মুখে কথাটি নেই! বুড়োও কারো অপেক্ষা না রেখে, দড়ি-দড়া খুলতে লেগে গেল। দড়ি খোলা হয়ে গেলে বললাম, “ওর মুখ থেকে পাগড়ি বের করে দাও, নইলে কথা বলবে কি করে ?”

কিন্তু লোকটাকে হাঁ করিয়ে দেখা গেল, মুখে পাগড়ি-টাগড়ি কিছু নেই, কখন সেটা চিবিয়ে গিলে-টিলে বসে আছে !

পাগড়ি গেলার কথা শুনে পুলিশরা বেজায় রেগে গেল। একজন তো বার বার বলতে লাগল গিলে ফেলেছে আবার কি ! ওতো নাকি তার ধোবির হিস্বে লেখ ছিল, এখন কি হবে।

ততক্ষণে রোগা লোকটার মুখে কথা ফিরে এসেছে, সেও রেগে বলল, “গিলেছি মানে আবার কি ? গলা দিয়ে নেমে গেলে আমি আর কি করতে পারি বল ? অবশ্যি খেতে যে খুব খারাপ লেগেছে তা বলছি না। বেশ টক-টক নোনতা-নোনতা।”

এই বলে সে ঠোঁট চেটে, পাগড়ির যে দুটো-একটা স্নতো লেগে ছিল সেগুলোকেও খেয়ে ফেলল।

তাই দেখে আমারও এমনি খিদে পেতে লাগল সে আর কি বলব। দূরে সেজদাদামশায়ের, বিরিঞ্চিদার পিসেমশাইয়ের গলার আওয়াজ শুনে বোঝা গেল ঠান্দিদিদের কাউকে এখনো খুঁজে পাওয়া যায় নি। সত্যি, গেল কোথায় সব, কে জানে হয়তো কিছুতে—

শুনলাম পুলিশ ইন্সপেক্টর বলছেন, “দেখতে ছোট হলে কি হবে, একেবারে কেউটে সাপের বাচ্চা। ও-ই যে এ-সমস্তর গোড়ায় তার কোনোই সন্দেহ নেই, নইলে ওদের এত বুদ্ধি আসে কোথেকে।”

পিসেমশাইও তক্ষুনি সায় দিয়ে বললেন, “হাঁ, আমাদের বিরিঞ্চি তো আগে এমন ছিল না। ঐ অতর্কু ছেলে দেখে, তাকে বিশ্বাস করে, দেখুন তো মশাই, শেষটা এই অঘোর জঙ্গলে প্রাণটা খোয়ালে।”

তাই শুনে সেজদাদামশাই বিরক্ত হয়ে বললেন, “রেখে দিন, মশাই।

আপনাদের বিরিকিটি কিছু কম যায় না। বোঁঠানের মাথায় হাত বুলিয়ে—”

পুলিশ ইন্সপেক্টর বললেন, “দেখুন, আপনাদের এই-সব পারিবারিক ব্যাপারগুলো অতি ছোট জিনিস। ঐ বিরিকি কি শ্যামাদাস মল’ কি না মল’, তাই দিয়ে দেশের কিই-বা এসে যায় বলুন। আসল কথা হল জমিদারমশায়ের মুক্তোর মালাটা গেল কোথায়? বড়-সায়ের আর আমায় আস্ত রাখবে না। আর মালা খুঁজে দিতে না পারলে আমার প্রমোশনেরই-বা কি হবে, তাই বলুন?”

### আট

তার পর ঘরের মধ্যে ঢুকে তো সব যে যার ধুপ্‌ধাপ্‌ তক্তাপোষের ওপর শুয়ে পড়ে, আমার দিকে তাকিয়ে তাকিয়ে একসঙ্গে বলতে লাগলেন, “ইস্‌! গাল টিপলে এখনো দুধ বেরোয়, অথচ এত বড় আরেকটা খুনে বদমায়েস ছুনিয়াতে আছে কি না সন্দেহ! তিন-তিনটে লোককে রাতারাতি একেবারে হাওয়া করে দিল মশায়!”

বিরিকিদার পিসেমশাই একটা দীর্ঘনিশ্বাস ফেলে বললেন, “সব থেকে খারাপ হচ্ছে যে বিরিকি হতভাগা আমার সিক্কের জামাটা গায়ে দিয়েই—”

সেজদাদামশাই বললেন, “স্-স্-স্—ওঁদের বিষয় অমন করে বলতে নেই। যা হবার তা হয়ে গিয়েছে। এখন ইন্সপেক্টর সায়েবের কর্তব্য হল এই ছোকরাকে জেরা করে সব কথা বের করে নেওয়া।”

এতক্ষণ রোগা ভদ্রলোক, পুলিশরা আর আমি হাঁ করে তাঁদের কথাবার্তা শুনছিলাম, কিন্তু কিছুতে যোগ দিচ্ছিলাম না। এবার সবাই মিলে একসঙ্গে কথা বলতে লাগলাম।

ইন্সপেক্টর আমার দুই কাঁধে হাত রেখে বলল, “বল্‌না বাবা কি করেছিস? মালার কথা নিশ্চয় তোর অজানা নেই, বল্‌না, নিদেন মালাটাই বের করে দে না। কথা দিচ্ছি তোকে ছেড়ে দেব, কেউ তোকে কিছু করবে না, দে দিকি বাপ্‌, মালাটা বের করে।

মহা মুশকিলে পড়ে গেলাম। আমি বেচারী ছেলেমানুষ, কিছুই জানি নে, অথচ কে কাকে বোঝায়। ভাবলাম দেখাই যাক একবার স্নানের ঘরে গিয়ে।

আমাকে উঠতে দেখে ওরাও উঠে পড়ল। স্নানের ঘরে ঢুকে ঈগল পাখির মতো তীক্ষ্ণ দৃষ্টি নিয়ে ঘরের প্রত্যেকটা ইঞ্চি পরীক্ষা করলান। দেখলাম ঐ একটিমাত্র দরজা, উঁচুতে ঐ একটিমাত্র শিক দেওয়া জানলা। তাই তো, ঠানুদিদিদের হল কি ?

অগুরা সবাই এগিয়ে এসে, দরজার কাছটিতে ভিড় করে একদৃষ্টে আমার দিকে তাকিয়ে রইল। নীচের তলা থেকে রাঁধাবাড়া ফেলে বুড়িও ততক্ষণে এসে ওদের সঙ্গে জুটেছে দেখলাম !

ওরা তাকে খুব জোরে ফিস্‌ফিস্‌ করে বলল, “চুপ! এ এবার মালা বের করে দেবে, সেই তাদের যা বাকি আছে বের করে দেবে।”

তাই শুনে বুড়িও চোখ গোল করে আমার মুখের দিকে চেয়ে থাকল !

হঠাৎ দেখলাম ঘরের কোণে, বালতির পিছনে একটা জিনিস চিক্-চিক্ করছে। অবাক হয়ে দেখলাম ছোট্ট একটা সোনার আংটি ! আমাকে সেদিকে চাইতে দেখে ওরাও সবাই ঘরের কোণে, বালতির পেছনে, সোনার আংটি দেখতে পেল !

সেজদাদামশাইও চিৎকার করে উঠলেন, “চিনেছি, চিনেছি। তবু বলছিস কিছু জানি নে। লক্ষ্মীছাড়া মিথ্যেবাদী। এমনি করেই পাপের গন্ধমাদন চাপা পড়ে মানুষেরা মরে চাপ্টা হয়ে যায়।”

ইন্সপেক্টরবাবু হঠাৎ আমার দিকে ফিরতেই আমি এক ছুটে স্নানের ঘরের ঠিক মাঝখানে চলে গেলাম। সঙ্গে-সঙ্গে মনে হল আমার পায়ের তলা থেকে মাটিটা সরে গেল, আমি অতল গভীর অন্ধকারে পড়ে গেলাম।

ওপর থেকে হো-হো করে চিৎকার আমার কানে এল।

কি আর বলব আমার মনের অবস্থা। পড়তে আর কতটুকুই-বা



সময় লাগল, তবু মনে হল পড়ছি তো পড়ছিই।

ছেলেবেলা থেকে আজ অবধি যত অন্যান্য করেছি, একটার পর একটা করে সব মনে পড়তে লাগল। যেগুলোর কথা একদম ভুলে গেছিলাম, এমন-কি, যে-সব ঘটনা কোনোকালে ঘটেই নি, সেরকমও রাশি রাশি মনে পড়ে গেল।

হঠাৎ ধপাস করে মাটি ছুঁলাম।

বুঝলাম কতকগুলো খড়কুটোর ওপর পড়েছি তাই যতটা লাগতে পারত, পেছনে ততটা লাগে নি।

তবু খানিকক্ষণ চোখ বুজে চুপচাপ বসে থাকলাম। তার পর যখন টের পেলাম যে সত্যি বেঁচে আছি, তখন আন্তে আন্তে চোখ খুলে দেখলাম যে, যতটা অন্ধকার ভেবেছিলাম, আসলে ততটা নয়।

দেখলাম যেন একটা শুকনো কুয়োর মতনের নীচে পড়ে আছি। পকেট চাপড়ে দেখলাম চিরুনি-চিরুনি ঠিকই আছে। বাঁচা গেল।

ওপর দিকে চেয়ে দেখলাম অন্ধকার সুড়ঙ্গ, চারি দিকে ঘিরে আছে মাকড়সার জালে ঢাকা পাথরের দেয়াল, নাকে এল সোঁদা সোঁদা একটা গন্ধ আর দেখলাম দেওয়ালের একদিক দিয়ে একটু আলোর রেখা আসছে।

সেই আলোতেই দেখতে পেলাম খড়ের ওর জ্বলজ্বল করছে বিরিঞ্চিদার মুক্তোর মালা। মালাগাছি তুলে নিলাম, মাঝখানের রঙিন পাথরটি মিটমিট করে জ্বলতে লাগল।

বসে বসে ভাবলাম কি মালা, কার মালা কে জানে। এই কি তবে জমিদার-গিন্নির হারানো মালা? তবে আগেকার সেই আরেকটা মালা সেটি কোথেকে এল? এ তো সে মালা হতেই পারে না। কারণ সেটাকে আমি ছাড়া আর কেউ তো বের করতে পারবেই না, আমিও পারব কি না সন্দেহ।

মনটা একটু খারাপ হয়ে গেল। মালাটা পকেটে পুরে ফেললাম। বিরিঞ্চিদাদের নিশ্চয় সাংঘাতিক কোনো বিপদ হয়েছে, নইলে কি আর

মালা ফেলে অমনি অমনি চলে যায়।

ভাবলাম ওই সুড়ঙ্গ দিয়ে ধুপ্‌ধাপ্‌ করে, একজনের উপর একজন ওরাও নিশ্চয় পড়েছিল। ওরা যখন বেরুবার পথ পেয়েছে আমিও পাব।

ভালো করে চেয়ে-দেখলাম কোথা দিয়ে আলোর রেখা আসছে। মনে হল সেদিকে যেন সরু পথ রয়েছে।

কত কালের পুরানো বাড়ি, কে জানে কেন এই গোপন সুড়ঙ্গ বানিয়েছিল, হয়তো কোনো চোরা-কারবার চালাত কেউ, তাই এই-সব গলিঘুঁচি তৈরি করে রেখেছিল। হয়তো শত্রুরদের ধরে এনে এখানে শেকল দিয়ে বেঁধে রেখে দিত। গা শিরশিরু করতে লাগল।

অদ্ভুত সেই গলিটা। কে জানে কারা এখান দিয়ে ভারী ভারী বাস্তু প্যাঁটিরাতে লাখ লাখ টাকার মোহর বোঝাই করে আনাগোনা করছে। ইস্, একটা বাস্তুও যদি পেতাম, তবে আর আমাদের এত কষ্ট করে লেখাপড়া শিখতে হত না।

দেখলাম দু পাশে তাক আছে, জিনিস খোলাবার আঁটা কড়া আছে। মনে হল হঠাৎ যদি দেখি একটা কঙ্কাল ঝুলে আছে। বুকের ভেতরটা ছ্যাৎ করে উঠল।

অবিশ্বি এক দিক দিয়ে দেখতে গেলে, ওপরকার ঐ ঘরের চাইতে আমার পক্ষে এই অন্ধকার ঘুঁপ্‌চিই অনেক বেশি নিরাপদ, তবু যদি হঠাৎ মাথার ওপর থেকে দড়ি ছিঁড়ে ঘাড়ের ওপর কিছু পড়ে।

তাড়াতাড়ি হাঁটতে লাগলাম। মনে হল ওপরে যেন ডানা ঝাপটানোর শব্দ শুনতে পাচ্ছি। কিসের যেন হাওয়া মুখে লাগল, অদ্ভুত একটা গন্ধ নাকে এল। মনে মনে বললাম, ও কিছু না, বাহুড়। আরো তাড়াতাড়ি হাঁটতে লাগলাম।

এখানে পথটা খানিক ঢালু হয়ে নীচের দিকে নেমে গেছে। পায়ের তলায় মাটি এত নরম যে কিছুমাত্র শব্দ হয় না।

ওপর থেকে টপ্‌ টপ্‌ করে কৌঁটা কৌঁটা কি যেন আমার মাথায়

পড়ল। সে সাদা কি লাল তা আর দেখবার উপায় ছিল না ঐ অন্ধকারে।

খানিক আগেই এই পথ দিয়ে বিরিক্কা, শ্যামদাসকাকা আর ঠানদিদি নিশ্চয় ভয়ে আধ নরা হয়ে, একজনের পেছনে একজন হেঁটে গেছেন। কোথাও যখন কেউ পড়ে-টড়ে নেই, তখন নিশ্চয় কোনো ভয়ের কারণও নেই।

বলতে না বলতে নরম কিসে হেঁচট খেয়ে উবু হয়ে পড়ে গেলাম। অন্ধকারটা যেন আরো কালো হয়ে ঘনিয়ে এল। তখনো মনে হচ্ছিল দূরে একটা হো-হো শব্দ।

নড়ছি চড়ছি না, কাঠ হয়ে নরম জিনিসটার ওপর পড়ে আছি। কান খাড়া করে রেখেছি সেটার নিশ্বাস ফেলার শব্দের জন্য। কিন্তু যদি নিশ্বাস না-ই ফেলে ?

উঠে বসলাম। কানে একটা থুপ্-থুপ্ পায়ের শব্দ। ঘন ঘন নিশ্বাস। তবে কি শেষপর্যন্ত ওদের নাগাল পেয়ে গেলাম নাকি ?

কিন্তু শব্দটাকে যেন একটু অস্বাভাবিক ঠেকল। যেন ভারী কিছু সাবধানে এগুচ্ছে। বুকের ভেতরটা আবার ছ্যাৎ করে উঠল।

উঠে বসে অন্ধকার ভেদ করে দেখতে চেষ্টা করলাম। খানিকক্ষণ কিছু বুঝতে পারলাম না। তার পর দূরে দেখলাম দুটো লাল চোখ জ্বলজ্বল করছে, আর নাকে এল কেমন একটা চেনা-চেনা অদ্ভুত গন্ধ।

আমি আর সেখানে বসে থাকবার ছেলেই নই। উঠেই দিলাম টেনে দৌড়।

### ময়

দেখি ঢালু পথটা হঠাৎ ডান দিকে বেঁকে শেষ হয়ে গেছে। সামনে একটা দরজা, ঠেলা দিতেই সেটা গেল খুলে। ভেতরে ঢুকে হাতড়ে হাতড়ে প্রকাণ্ড ছড়কোটাকে লাগিয়ে দিলাম। ব্যস।

কোথা থেকে যেন অল্প একটু আলোও আসছে, মনে হল হাতের কাছে প্রকাণ্ড এক ব্যক্তির ওপর দেশলাই আর মোমবাতি।

দেখলাম আলাদীনের সেই গুহায় এসে পড়েছি। ছাদ থেকে ঝুলছে বিশাল বিশাল গালচে। দেওয়ালের সামনে সারি দিয়ে রয়েছে পেতল-কাঁসার বাসন আর ফুলদানির পাহাড়। ঘরের মাঝখানটা কাঠ-খোদাইয়ের টেবিল, হার্মোনিয়ম আর বাস-প্যাটরা দিয়েই বোঝাই করা।

ছুটে-একটা ব্যক্তির ঢাকনা খুলে আমি তো থ। কোনোটা বা রেশমি শাড়িতে ভর্তি, কোনোটাতে হাতঘড়ি, রূপোর বাসন, ফাউন্টেন-পেনের গাদা। আর একটাতে—বিশ্বাস করবে না হয়তো—সোনার গয়নায় ঠাসা।

কি যে করব ভেবে পাচ্ছিলান না। শ্যামদাসকাকা সামান্য একটা মুক্তার মালা পেয়েই আত্মহারা আটখানা হচ্ছিল, আর আমার দেখ কত জিনিস। তা ছাড়া একটা মুক্তার মালা।

মালাটাকে পকেট থেকে বের করে বড় বাস-প্যাটার ওপর রাখলাম।

এখন মুস্কিল হচ্ছে এই এতগুলো জিনিস যে পেলাম, এগুলোকে বাড়ি নিয়ে যাওয়া যায় কি করে? :

একটা হার্মোনিয়ম একটু বাজিয়ে দেখলাম, দিব্যি প্যা-প্যা করে উঠল। বন্ধ ঘরে দারুণ জোরে বাজছে মনে হল। ভাবছিলাম সেবার বিরিকিণ্ডার হার্মোনিয়ামে একটু সামান্য জল ফেলেছিলাম বলে আমাকে কি না বলেছিল। এখন আমার নিজেরই চারটে আঙ্গু আর একটা ভাঙা হার্মোনিয়ম।

কিন্তু কতক্ষণ আর এই-সব ভেবে আনন্দ করা যায়? খিদেয় পেট তো এদিকে ঢাক।

দেয়ালে সব চমৎকার ছবি ঝুলানো। একটাতে দেখলাম একজন বুড়ি মেম মাছ ভাজা খাবে, তাই হাত জোড় করে কাকে ধন্যবাদ দিচ্ছে, আর-একটা বেড়ালও মাছ ভাজা খাবার জন্য ঝাঁকু-পাঁকু করছে।

আরেকটাতে দেখলাম হয়তো ঐ বেড়ালটাই হবে, মুখে করে একটা বিরাট চিড়ি মাছ নিয়ে যাচ্ছে। মুখের এক দিকে চিড়ি মাছের মুণ্ডু আর অল্প দিক দিয়ে ল্যাজ বেরিয়ে রয়েছে। আমি সকাল থেকে কিছু খাই নি এ ভাবা যায় না।

আর টিকতে না পেরে, দড়াম করে দরজাটাকে খুলেই দিলাম।

কাঠ হেসে দাড়িওয়ালা বুড়োটা ভেতরে ঢুকল। কোমরে হাত দিয়ে মাথা থেকে পা পর্যন্ত দেখতে লাগল। আমার গা শিরশির করে উঠল। বললাম, “আর দেরি করছ কেন? সাহস থাকে তো আমাকে মেরে ফেল না। আমার গলা ক্রেটে ফেল, গুলি কর, বুকে ছোরা বসাও কাঁসি দাও! আমি আর কিছুকে ভয় করি না। আমার ভীষণ খিদে পেয়েছে!”

বুড়ো বলল, “সে কথা বললেই হয়।”

বলে সামনের একটা বাস্র থেকে কতকগুলো কাপড়-চোপড় বের করে ফেলে, তলা থেকে এক টিন বিস্কুট, এক টিন সার্ডিন মাছ, এক বোতল কমলালেবুর রস আর টিন-খোলার যন্ত্র বের করল।

তার পর মুক্তোর মালাটাকে দেখে ভারি খুশি হয়ে, সেটাকে ঐ বাস্র পুরে, ঘরের দরজাটা ভেতরে থেকে আবার বন্ধ করে দিয়ে, আমার কাছে ফিরে এল।

তার পর বাস্রের ওপর চেপে বসে মহা ভোজ হল।

খাওয়া-দাওয়া শেষ হলে, পকেট থেকে বেজায় একটা ময়লা রুমাল বের করে, মুখ মুছে, বুড়ো সেটা আমার দিকে বাড়িয়ে দিল। আমার ও-সব কিছুরই দরকার করে না। আমি সর্বদা হয় প্যাণ্টে নয় মাথায় হাত মুছি!

তখন বুড়ো বলল, “দেখতে তুমি এত খুদে অথচ চালাক তো কম নও। আমাদের দলে যোগ দেবে? পরে হয়তো দলপতিও হতে পারো।”

আমি বললাম, “এখন দলপতি কে?”

সে দাড়িতে হাত বুলিয়ে বললে, “ইয়ে, আপাতত আমিই।”

আমি বললাম, “তুমি তো বুড়ো। কদিনই-বা দলপতি থাকবে।

তা হলে আরেকটু কমলালেবুর রস খাই ?

বেশ ভালোই লাগছিল।

এমন সময় কে দরজার ধাক্কা দিতে লাগল। আমরা দুজনে মুখ চাওয়া-চাওয়ি করতে লাগলাম। মোমবাতিটাও ঠিক সেই সময় ছোট থেকে ছোট হয়ে গিয়ে শেষ অবধি নিবেই গেল।

নিশ্চয়ই আমরা টিন, বোতল, টিন-কাটা সব বাক্সের পিছনে লুকিয়ে ফেলে, চুপচাপ বসে রইলাম।

বুড়োর কানে কানে বললাম, যদি দরজা ভেঙে ঢোকে ?

বুড়ো বলল, “ইস, দরজা ভেঙে ঢুকবে। তা হলেই হয়েছিল। এরা নিজেদের পোষা গোরুকে নিজেরা ভয় পায়, তা জানো ?”

আবার কানে কানে বললাম, “কিন্তু যদি সঙ্গে পুলিশরা এসে থাকে ? সে বলল, “তাই তো দোর খুলছি না।”

বাইরে থেকে ওরা মহা ধাক্কাধাক্কি করল, কত কি বলে শাসাল, “আগুন লাগিয়ে দেব। ঠুবাইরে থেকে তাল দেব। ভূতের ভয় দেখাব।” এই-সব।

সত্যি বলছি আমার একটু একটু ভয়-ভয় করছিল। বুড়ো কিন্তু পা ছড়িয়ে বসে, একটু একটু হাসতে আর দাড়িতে হাত বুলুতে লাগল।

হঠাৎ বুড়ির গলা শোনা গেল।

“ভালো চাও তো বেরিয়ে এসো। নইলে এই আমি হাটের মাঝে হাঁড়ি ভাঙলাম। গত বছরের আগের বছরের সেই ছাগলদের কথা জানাজানি হয়ে গেলে তখন কিন্তু আমাকে দোষ দিতে পাবে না বলে রাখলাম।”

তাই শুনে বুড়ো ভারি ব্যস্ত হয়ে, ঘরময় পায়চারি করে বেড়াতে লাগল। আমাকে বলল, “মেয়েদের কখনো বিশ্বাস করতে হয় না। ঠগ, জোচ্চোর, ধান্দাবাজ।”

বুড়ি বলে যেতে লাগল, “সেই যে মাঘমাসের শেষের দিকে, ভোরে উঠে ?”

বুড়ো চিৎকার করে বলল, “এই চোপ্ খবরদার !”

বলে দরজা খুলে একেবারে বাইরে এসে দাঁড়াল। আমিও কি করি, সঙ্গে-সঙ্গে বেরিয়ে এসে, ওর পেছনে যতটা পারি গা ঢাকা দিয়ে দাঁড়িয়ে গেলাম।

বুড়োর বগলের তলা দিয়ে উঁকি মেরে, আশ্চর্য হয়ে দেখলাম পুলিশ-টুলিশ কেউ কোথায় নেই, শুধু বুড়ি এক হাতে একটা খুদে লঠন, অন্য হাতে একটা খুস্তি নিয়ে দাঁড়িয়ে আছে।

বুড়ির চালাকি দেখে বুড়ো রেগে কাঁই ! “পুলিশরা কই ?”

বুড়ি বললে, “সে আমি কি জানি ? আমি কি তাদের বটিগাট ? তাদের কত কাজ। এখন তারা খানাতল্লাসি করতে করতে, তোমার ঘর অবধি পৌঁছেছে। দেখে এলাম তোমার বাক্স খুলে তোমার বিড়ি খাচ্ছে আর তোমার খাটে বুট-পরা ঠ্যাং তুলে, তোমার ডাইরি পড়ছে। কি সব লিখেছ বানান ভুল।

বুড়ো তো দারুন রেগে গেল।

“বেশ করেছি বানান ভুল করেছি। তোমার দাদা হই না আমি ? তুমি এখানে কেন।”

“আহা, আমি তোমার ডাইরি পড়া শুনি, আর তুমি। এদিকে আমাদের সকলের চোখে ধুলো দিয়ে, জিনিসপত্রগুলো নিয়ে ভেগে পড়া আর কি ! উনি আর খোকা আর আমি পথে দাঁড়াই, তোমার তো তাই হচ্ছে।”

তার পর আমার ঠ্যাং দেখতে পেয়ে বললে, “বাঃ ! এরই মধ্যে সাকরেন্দ্র পাঁকড়ে ফেলেছ দেখছি।”

বুড়ো কি যেন বলতে যাচ্ছিল, এমনি সময় শোনা গেল মেলা লোকের জুতো-পরা পায়ের মচ্ মচ্ শব্দ।

অমনি এদের ছজন্যরই মুখ একেবারে পাংশুপানা। নিঃশব্দে ঘরের

ভেতরে আমাকে শুক্কু টেনে নিয়ে, দরজা বন্ধ করে আগল দিয়ে দিল।  
 কারো মুখে কথাটি নেই, বুক টিপ্‌টিপ! বাইরে এবার সত্যি সত্যি  
 মেলা লোকের পায়ের শব্দ শোনা গেল।

### দশ

এবার যারা এল কে জানে তারা বন্ধু না শত্রু। তবু মনে হল ঘরের  
 এরা ছুজন ওদের চাইতে ঢের ভালো। বুড়ি কি ভালো রান্না করে।

— বাইরে থেকে ধাক্কাধাক্কি, আর সে কি চ্যাচামেচি! কিন্তু ঐ বিশাল  
 দরজা, তার এমনি ভারী পাল্লা, ভাঙে কার সাধ্যি।

এমনি সময় ঘরের ভেতর থেকেই কানে এল ঘড়-ঘড় ঘোঁৎ-ঘোঁৎ।  
 পিলে চমকে উঠল। ই-কি-রে-বাবা। বুড়ি গিয়ে এমনি দাড়িওয়ালার  
 পেছনে লুকিয়ে পড়ল।

আমি কি করি? বড় একটা বাক্সের ঢাকনি খুলে তার ভেতরেই  
 উঠলাম—

বাক্সে একটা মড়া নাকি। বুড়োবুড়ি তো প্রায় অজ্ঞান।

এমনি সময় মড়াটা আস্তে আস্তে উঠে বসল। আমিও তাড়াতাড়ি  
 চ্যাচাটা টেনে নিলাম।

মড়াটা একদৃষ্টে আমার দিকে চেয়ে রইল। আস্তে আস্তে আমার  
 বুদ্ধিশুদ্ধি ফিরে এল। বুড়ো একটা দেশলাই জ্বালাতেই চিনলাম সে  
 বিরিক্কাটা উঃফ্, বাঁচা গেল! আরেকটু হলে ভয়ের চোটে মরে  
 গেছলাম।

বিরিক্কাটা বাক্স থেকে বেরিয়ে এসে প্রথমে বেড়ালের মতো গা  
 মোড়ামুড়ি দিল, তার পর জামাকাপড় ঝেড়েঝুড়ে কাঠ হাসি হাসল।

তখনো কিন্তু সামনে ঘড়-ঘড় ঘোঁৎ-ঘোঁৎ শুনতে পাচ্ছিলাম। তবে  
 আমার সাহস বেড়ে গেছিল, ঢক্-ঢক্ করে আর ছোটো বাক্সের ঢাকনি  
 খুলে দিলাম।



দেখি একটার মধ্যে ঠান্দিদি মুছে গেলেন, আরেকটিতে শ্যামাদাস-কাকা দিব্যি কুণ্ডলী পাকিয়ে নাক ডাকাচ্ছে। মনে হল সত্যি সত্যি ঘুমুচ্ছে।

বিরিঞ্চিদা খোঁচা মারতেই সে উঠে বসে, চোখ না খুলেই বলল,  
“মালা পাওয়া গেছে?”

“মালা দিয়ে কি হবে? সে তো তোমাদের নয়।”

শ্যামাদাসকাকা চোখ খুলে বললে, তোমাদেরও নয়।”

আমি বললাম, “বাইরে কিন্তু বিরিঞ্চিদার পিসেমশাই, সেজদাদামশাই, পুলিশ পেয়াদা। তার কি হবে?”

তাই শুনে যে যেখানে পারল একেবারে বসে পড়ল।

বিরিঞ্চিদা ব্যস্ত হয়ে জিগ্গেস করল, “পিসেমশাই কি একাই এসেছেন?”

বললাম, “বলছি সঙ্গে সেজদাদামশাই, পুলিশ-টুলিশ মেলা লোক খাপেঝাঁপে।”

বিরিঞ্চিদা একটু আম্তা আম্তা করে বলল, “সবাই কি পুরুষ মানুষ?”

ভ্রুংখ কষ্ট সহ করে বিরিঞ্চিদা কি পাগল হয়ে গেল শেষটা?

বুড়ি বললে, “মালাটা কোথায়? ওর তো একটা ব্যবস্থা করা দরকার।”

দাড়িওয়ালা বিরক্ত হয়ে উঠল, “মালা তো আর তোমাদের নয়।”

এই বলে যে বাঞ্চে মালা ছিল, তার ওপর চেপে আরাম করে পা উঠিয়ে বসে পড়ল।

আমি বললাম, “ঠান্দিদির মুছে ভাঙানোর কিছু হবে না?”

শ্যামাদাসকাকা বললে, থাক না, কি দরকার। উঠলেই তো বাঞ্চে বকবেন।”

বলবামাত্র ঠান্দিদি তড়াক করে লাফিয়ে উঠে বাজ্ঞ থেকে বেরিয়ে বললেন, “ব্যাটা লক্ষ্মীছাড়া, তোমার সব কথা যদি বলে না দিই—”

শ্যামাদাসকাকা বলল, “সাবধান, শেষটা নিজে মুকু না জড়িয়ে পড়।”

তখন কি রাগ সকলের! দেখতে দেখতে ঘরের মধ্যে ছোটো দল হয়ে গেল। এক দিকে বিরিকিদ্দা, শ্যামাদাসকাকা, ঠান্দিদি। অন্যদিকে বুড়ি আর দাড়িওয়াল। মাঝখানে আমি।

বিরিকিদ্দা আবার জিগ্গেস করল, “সেজদাদামশাইকে কি একলা দেখলি নাকি? সঙ্গে বামুন-টামুন কিম্বা লাল শাড়ি পরা মেয়ে-টেয়ে নেই তো?”

বললাম, “কই না তো! তবে পুলিশরা সব আছে।”

বুড়ি খানিক এধার-ওধার খুঁজে বলল, “বল না মালাটা কোথায়?”

বুড়ো আবার বললে, “বলছি মালা তোমার নয়!”

বুড়ি বসে পড়ে “বলতে লাগল, “নয়ই-বা কেন বল? জমিদার-গিনিরই-বা হবে কেন? কতবার দেখেছি তাঁর ফরসা মোটা গলায় ছোট-ছোট পায়রার ডিমের মতো শোভা পাচ্ছে তুমি বল, রঙটাই যা ফরসা, নইলে আমার চাইতে কোন বিষয়ে উনি ভালোটা তাই বল।

বুড়ো কাষ্ঠ হাসি হাসল।

“তোমার যা বুদ্ধি ইয়ে তা ছাড়া মাঝখানের পাথরটা মোটেই সাদা রঙ নয়, সেটা নীল।

বুড়ি তো অবাক।

“বল কি? আমি জানি না কি রঙের? কতবার দেখেছি পুজোর সময় ঠাকুরবাড়িতে। যতবার দেখেছি ততবার মনে হয়েছে আমি ঐরকম চওড়া লাল পালের গরদ পরে, কপালে এই বড় সিঁতুরের ফোঁটা একে, পায়রার ডিমের মতো বড়-বড় মুক্তোর ঐ মালা গলায় বুলিয়ে, ঠাকুরবাড়ির সিঁড়ি দিয়ে নেমে আসি, আর সবাই দেখতে থাকুক আর হিংসেয় ফুলে ফুলে উঠুক।”

দাড়িওয়াল টেঁচিয়ে বলল, “যা খুশি বললেই তো আর হল না। মালার রঙই তো জানো না। বিশ্বাস না হয় এই দেখ।”

## গুপীর গুপ্তখাতা

বলে বাস্তবের ডালাটা খুলে ফেলে নিয়ে মালা বের করে তুলে ধরল।

আধ অন্ধকার ঘরে মুক্তোর ছড়া জলজল করতে লাগল।

বুড়ো আবার একটা ছোট মোমবাতি জ্বালতেই বুড়ি অবাক হয়ে দেখল মধ্যিখানের পাথরটা সত্যিই নীল।

অনেকক্ষণ তার কথা বলবার শক্তিই ছিল না, তার পর বলে উঠল, “না না, এ সে মালা নয়। এর জন্ম আমি সারা রাত জেগে কাটাই নি। তোমরা ভুল মালা এনেছ।”

ঠিক এই সময় ঘরের ছাদে কি যেন মড়মড় করে উঠল। ছোট মোমবাতি, তার আলো ছাদ অবধি পৌঁছয় না। দারুণ ঘাবড়ে গেলুম সবাই।

ঠিক সেই সময় ঘরের ছাদ থেকে কি সব ভেঙে-টেঙে, ঝুপ করে একটা জিনিস মাটিতে পড়ল।

অবাক হয়ে দেখলাম সেই খোঁচা-দাঁড় রোগা ভদ্রলোক, যাকে পুলিশরা ভুল করে ধরেছিল।

চিঁ চিঁ করে বললেন, “বাবা। ঝুলে ঝুলে হাতের মাসিলগুলো সব টেনে লম্বা হয়ে গেছে। ভাগ্যিস হাসতে হাসতে পড়েই গেলাম।”

মনে হল ঘরের ভিতরটা বেশ গরম হয়ে উঠেছে, বোধ করি লোকের ভিড়ে।

বুড়ি বিরক্ত হয়ে জিগ্গেস করল, “অত হাসির কারণটা কি, শুনতে পারি?”

ভদ্রলোক বললেন, “তুমি গো গিনি, তুমি। লাল পাড় গরদ পরে, মুক্তোর মালা গলায় ঝুলিয়ে, তোমার কেমন ধারা রূপ খুলবে ভেবে, হাসতে হাসতে প্রায় মরেই গেছলাম।”

আমি কান খাড়া করে ছিলাম, এবার না জানি কি হবে।

বুড়ি কিন্তু কোনো উত্তর দিল না। মালার দিকে চেয়ে ঘুম ঘুম সুরে বলতে লাগল, “সমুদ্রের তলায় বালির ওপর ঝিনুক পোকা পড়ে থাকে। খোলার ভেতরে সমুদ্রের বালির কণা ঢুকে যায়। ওর গা

কুটকুট করে, তাই সাদা চক্চকে রস বের করে, তাই দিয়ে বালির গা ঢেকে দেয়, বালির গা মোলায়েম হয়ে যায়। বিলুখ পোকাকার আরাম লাগে। তার পর একদিন, মাথার ওপর কাচ লাগানো বালটি-মুখোশ পরে, বাতাসের নল নাকে লাগিয়ে, জলের তলায় নেমে গিয়ে, ডুবুরিরা ঐ মুক্তো তুলে আনে। তাই দিয়ে মালা গাঁথিয়ে, জমিদার-গিন্নি পরেন। কিন্তু এ মালা সে মালা নয়।

কেন যেন বাইরের গোলমাল থেমে গিয়েছিল। সবাই একটু আশ্বস্ত হল, মালাটা বুড়োর হাতে রইল।

বিরিঞ্চিদা ব্যাপারটাকে বুঝিয়ে বললে, “অন্ধকার গর্ত দিয়ে যখনি পড়ে গেলাম, তখনি জানি আমাদের কপালে দুঃখ আছে। তার ওপর ঠান্দিদি পড়লেন আমার ঠিক পেটের ওপর। উঃ, নাড়িভুঁড়ি যে এলিয়ে যায় নি সেই যথেষ্ট। দেখতে রোগা হলে কি হবে, কম ওজন ওঁর!— যাক গে, গলি দিয়ে হাঁটছি, তো হাঁটছি, আবার পেছনে শুনি কিসের পায়ের শব্দ। পাই পাই করে ছুটে, এ ঘরে ঢুকে, যে যেখানে পারলাম সঁঝোলাম। ঐ গলিতে ডালকুত্তা ছাড়া আছে। তার চোখ জ্বলছে দেখলাম। আর তোরা এখানে খাওয়া-দাওয়া করলি।”

বুড়া বললে, “ধেং, কী সব বীরপুরুষ। ও ডালকুত্তা হতে যাবে কেন, ও তো টেঁপির বাচ্চা।”

“টেঁপি আবার কে?”

“কেন আমাদের গোরু।”

তাই শুনে সবাই খানিক চুপ করে রইল।

তখন শ্যামাদাসকাকা বলতে লাগল, “আচ্ছা, এত জিনিস এরা পেল কোথেকে?”

কারো মুখে রা নেই। আমরা মোমবাতি নিয়ে ঘরময় ঘুরে ঘুরে সব দেখতে লাগলাম। একসঙ্গে এত ভালো জিনিস আমি কখনো দেখি নি।

## গুপীর গুপ্তখাত

হঠাৎ বাইরে বিকট চিৎকার। “বাঁচাও! বাঁচাও। মেরে ফেললে রে। ওরে বাবা রে। মরে গেলাম রে।”

এ আবার কি? বুড়ির দয়া হল, ঠান্দিদির বার-বার মানা সত্ত্বেও দিল দরজা খুলে। হুড়মুড় করে এসে ঢুকলেন ফরসা, মোটা, কৌকড়া-চুল, সম্পূর্ণ এক অচেনা ভদ্রলোক। মিহি ধুতি পরা, কৌঁচা দোলানো, হাতে হীরের আংটি, সামনের চুল বেজায় লম্বা, এলোমেলো হয়ে কপালের ওপর পড়েছে, ভয়ে সারা গা বেয়ে ঘাম ঝরছে, চোখ ঠিকরে বেরিয়ে আসছে, হাত-পা কাঁপছে।

ধপ্ করে একটি বাস্তুর ওপর বসে পড়তেই, ইনি আবার কোনো নতুন বিপদের কথা বলেন, তাই শোনবার জন্ম, আমরা সব ঘিরে দাঁড়িলাম।

ফৌস করে একটা নিশ্বাস ছেড়ে তিনি বললেন, “ভাগ্যিস প্রাণটা রক্ষা করলেন। আরেকটু হলেই যে গোরুতে খেয়ে ফেলেছিল আমাকে। এতকাল মা কালীকে ফি বছর জোড়া পাঁঠা দেওয়া সত্ত্বেও আরেকটু হলেই গোরুর পেটে গেছলাম।”

বুড়ি তখন দাড়িওয়ালাকে সে কি ধমক। আবার টেঁপিকে ছেড়ে দিয়েছে? এখন বাচ্চা যদি সব ছুধ খেয়ে ফেলে, কাল সকালে কি করে চা হবে গুনি?”

মোটা ভদ্রলোক কপালের ঘাম মুছতে মুছতে বললেন, “কাল সকাল অবধি বাঁচলে পর তবে তো চা খাওয়া হবে।”

## এগারো

ঐ কথা বলে যেই-না ঘাড় ফিরিয়েছেন মুক্তোর মালার ওপর চোখ পড়েছে। ভীষণ চমকে উঠলেন, সাপ দেখলে-মানুষেরা যেমন চমকায়।

“ও কি, ওটা কোথায় গেলেন?”

তার পর বুঁকে পড়ে ভালো করে দেখে বললেন, “নাঃ, সেটা নয়,

এটা অল্প মালা । তাতে অল্প পাথর ।”

তখন বিরিক্ষিদারা সবাই মিলে তাঁকে চেপে ধরল, “কি মালা, কেমন মালা, খুলে বলতেই হবে । সবাই মিলে হয়তো-বা সাহায্যও করা যেতে পারে ।”

বিরিক্ষিদাদা সাহায্য করবে শুনে আমার দারুণ হাসি পেল ।

ভদ্রলোক বললেন, “আমি হল্যাম সেই জমিদার, যার গিন্নির মুক্তোর মালা চুরি গেছে । বুঝলেন, বেশ একটা মোটা টাকার ইন্সিগুর ছিল, খোয়া গেলে সেটি পাওয়া যায়, তা গিন্দি দিনরাত মালা আগলে রাখবেন । শেষপর্যন্ত গেল তো গেল, অত একটা হাঁকজাক করবার মতোও কিছু নয় কিন্তু গিন্দির সে কি চ্যাঁচামেটি ।

“বার বার বললাম, ‘বাড়িতে পুলিশ ঢুকিয়ে না, ওতে দেশের অমঙ্গল হয় । তার ওপর আমার পেট কামড়াচ্ছে, আমি কাউকে ডাকতে-টাকতে পারব মা ।’ কিন্তু কে শোনে । ভাইকে পাঠিয়ে গোটা খানাটাকে বাড়িতে তুলে আনলেন, মশায় ।”

“তার পর ধরপাকড় খানাতলাশি । মালা তো পাওয়া গেলই না, উপরন্তু আমার অমন ভালো বায়ুন ঠাকুরটা রাগ করে দেশে চলে গেল, এখন সে ফিরলে হয়—হঠাৎ এ মালাটাকে দেখে চমকে উঠেছিল্যাম, বুঝলেন ? ভয় চুকে গেছিল, মালাটা বুঝি পাওয়াই গেল আর টাকা-গুলো হাতছাড়া হল ।—না, না ব্যস্ত হবেন না, এটা মোটেই বিভিন্ন মালা নয় ।”

আমি চুপ করে থাকতে না পেরে বললাম, “তা হলে শেষপর্যন্ত চুরি হয়েছিল কি করে ?”

“আরে সেই তো হল সমস্যা । কেমন করে চুরি হল জানা থাকলে কে চুরি করল জানতে আর কতক্ষণ ? মোট কথা, সেটিও সিন্দুক নেই, আর গিন্দিও এমনি কাণ্ড লাগিয়েছেন যে বাড়ি ছাড়তে বাধ্য হয়েছি । এতটা ভাবি নি ।”

বিরিক্ষিদা তখন গায়ে পড়ে বলল, “মালা হয়তো আমরা খুঁজে দিতে

পারি।”

কোথায় খুশি হবেন, না, তাই শুনে জমিদার বিরক্ত হয়ে বললেন, “থাক্ মশাই, আপনাদের আর পরোপকার করতে হবে না।”

বুড়ো বুড়ি আর রোগা ভদ্রলোক চুপচাপ ছিল। হঠাৎ তাদের দিকে ফিরে জমিদারবাবু বললেন, “আচ্ছা, মাকড়ি-পরা, বাবরি চুল, ছোকরা কাউকে চেনেন আপনারা?”

শুনে আমরা চারজন তো চমকে উঠলামই, ওরা তিনজনও কাগজের মতো সাদা হয়ে গেল।

জমিদারবাবু আশ্চর্য হয়ে বললেন, “চেনেন নাকি তাকে?”

বুড়ি সাদা ঠোঁটের ফাঁক দিয়ে ফিস্‌ফিস্‌ করে বলল, “কেন? তাকে দিয়ে আপনার কি দরকার?”

“মানে তার সঙ্গে আমার একটা জরুরি কাজ ছিল! সে যে আমাকে কি বিপদেই ফেলেছে, পেলে একবার দেখে নিতুম।”

বুড়ি কিছু বলবার আগেই রোগা ভদ্রলোক বাস্তুর পেছন থেকে বেরিয়ে এসে বিষম রেগে বললেন, আচ্ছা কে কার্কে নেবে দেখা যাবে। তার ডান হাতের একটি খাপ্পড় খেলে, আপনার ঐ-সব জমিদারি চাল ঘুচে যাবে।”

“ও হো। তা হলে তাকে চেনেন দেখছি।”

ভদ্রলোক একটু অপ্রস্তুত হয়ে গেলেন।

“না, মশায়। বলছি তাকে আমরা চিনিও না, শুনিও না, চোখেও দেখি নি, সে এখানে থাকেও না!”

বুড়িও হঠাৎ ফোঁৎ-ফোঁৎ করে কেঁদে ফেলে বললে, “সে তো আপনার কোনো অনিষ্ট করে নি। এ-সমস্ত কেবল তাকে বিপদে ফেলবার চেষ্টা। মোটেই আমরা তাকে চিনি না, আর মোটেই সে কাল সন্ধে থেকে এখানে নেই। উঃ। আপনারা কি পশু না পাষণ্ড?”

জমিদারবাবু তো এত কথা শুনে ভারি অপ্রস্তুত। ব্যস্ত হয়ে বলতে লাগলেন, “আই, আপনি কেন ওরকম ক'ছেন বলুন তো। আমিও তো

তাকে ভালো লোকই ঠাউরেছিলাম, কিন্তু কি যে বিপদে ফেলে দিল আমাকে। সামনে জেলখানার লোহার দরজা আর গিছনে গিঞ্জি।”

তার পর মালাটার দিকে তাকিয়ে বলতে লাগলেন, “এ মালাটার সঙ্গে যে সাদৃশ্য আছে সে বিষয়ে কোনো সন্দেহ নেই, কি এ সে নয়। সে মালা কি আর আমি চিনি নে? আগে ঠাকুমা পরে থাকতেন আর আমার মা হাঁ করে চেয়ে থাকতেন। তার পর ঠাকুমা বুড়ি হলে, মা পরে থাকতেন—আর গিঞ্জি হাঁ করে তাকিয়ে তাকিয়ে থাকতেন। এখন মা বুড়ি হয়েছেন, গিঞ্জি ওটাকে পরে থাকেন। লাখ টাকা দিয়ে ইনসিওর করা, কিন্তু আজকালকার চোরগুলো পর্যন্ত এমনি ওয়ার্থলেস যে সামান্য একটা লোহার সিদ্ধুক খুলতে পারে না। আরে ছো, ছো, আজকালকার চোরদের ওপর পর্যন্ত নির্ভর করা যায় না, মশায়।

“ভাবতে পারেন শাশুড়ির আগে তার শাশুড়ি, তার আগে তার শাশুড়ি—এমনি করে মৃত্যুর মালা গলায় বুলিয়ে, শাশুড়ির লাইন চলে গেছে সেই মাকাতার আমল পর্যন্ত। কিন্তু এবার বাহাধনরা জব্দ। গিঞ্জি হলেন লাস্ট ম্যান। এ ছেলেটার সঙ্গে যদি কেউ আমার দেখা করিয়ে দেয়, তাকে এখুনি দশ টাকা দিই।”

এ কথা বলবামাত্র দাড়িওয়াল এক গাল হেসে এগিয়ে এসে বলল, “কই দশ টাকা? দেখি।”

বুড়ি আর রোগা ভদ্রলোক তার কোমর বাগেটে ধরে তাকে আটকে রেখে চ্যাঁচাতে লাগল, “না, না, সে এখানে থাকে না, তাকে আমরা চিনি না। এ লোকটা ভারি মিথ্যাবাদী, ওর কথা বিশ্বাস করবেন না।”

বুড়ো ওদের হাতের মুঠোর মধ্যে থেকে দাড়ি ছাড়াতে ছাড়াতে বলল, “কে মিথ্যাবাদী? কাল রাত্রে কে খেয়েছিল ছুধের সর? আমি সাফাৎ বড় ভাই হয়ে সারা দিন খেটে মরি, আর কে এলেই মাছের মুড়ো পায়? নিজেদের গোরুর ভয়ে জুজু, আবার সে-ই খায় ক্ষীরের চাঁচি? কই, দেখি তো আপনার কাছে সত্যি দশ টাকা আছে কি না, দেখি আপনার মনিব্যাগটা।”



তখন জমিদার মাথা-টাঁথা চুলকিয়ে বললেন, “ইয়ে—মানে—আমার মনিব্যাগে সত্যিই দশ টাকা আছে, কিন্তু সেটা আমার সঙ্গে নেই। আসবার সময় তাড়াতাড়িতে ইয়ে—”

বুড়ো তো রেগে আশুন।

“বেশ, মশায়, বেশ। কাজ বাগাবার ফন্দিটে তো মন্দ নয়। যান ওকে আমরা কেউ চিনি না। আগে দশ টাকা ফেলুন, তার পর ভেবে দেখা যাবে। কত কথা তো আগে ভুলে যাই, আবার পরে মনে—উঃ।”

বুড়ির হাতের প্রচণ্ড চিমটি খেয়ে তবে তার মুখ বন্ধ হল।

ঠিক এই সময় ওপর থেকে খচমচ্ করে কতকগুলো কাঠ—কুটো নীচে পড়ল।

সবাই অবাক হয়ে ওপর দিকে তাকাতেই, বোঁগা ভদ্রলোক ব্যস্ত হয়ে বলতে লাগলেন, “ও কিছু নয়, আমি এতক্ষণ মাচটার ওপর বসেছিলুম কিনা, তাই ওটা ছলছে আর কাঠ—কুটো ভেঙে পড়ছে। কি মুশকিল। সবাই ওপরে তাকাচ্ছেন কেন? নীচের দিকে চেয়ে দেখুন, একটা বালিশও আমার সঙ্গে পড়ছে—কি জ্বালা, তবু চোখ নামায় না।”

কিন্তু কে শোনে। সবাই একদৃষ্টে মাচার পানে তাকিয়ে, কারণ মাচাবাঁধা পুরোনো দড়ি, চোখের সামনে আস্তে আস্তে ছিঁড়ে ছুঁটুকরো হয়ে গেল, এক রাশি বিছানা বালিশ বুপঝাপ, নীচে পড়ল, তার সঙ্গে এক পাটি লাল বিছাসাগরী চটিও পড়ল।

আশ্চর্য হয়ে ওপর দিকে চেয়ে দেখি যে ঝাঁকড়া-চুল ছোকরা, কানে মাকড়ি ও এক পায়ে চটি পরে মাচার বাঁশ ধরে বুলছে। আস্তে আস্তে বাঁশটিও খুলে এল আর সেও নেমে পড়ল।

নোমেই-জমিদারবাবুকে বলল, “এই তো দেখা হল, তা হলে দিন দশ টাকা।”

আমরা সবাই তো হাঁ।

তার পর বুড়ি চাপা গলায় বললে, “এই খোঁকা, পালিয়ে যা বলছি। এখানে থাকলে তোকে এরা বিপদে কেলেবে। ভালো চাসতো পালো।”

খোকার কিন্তু সেদিকে কানই নেই। জমিদারবাবুকে আবার বলল, “কই, বের করুন টাকা। এই তো আমার সঙ্গে দেখা করিয়ে দিলাম।”

ঠান্দিদির এতক্ষণ কথা বন্ধ হয়ে গিয়েছিল, এবার বুড়িকে জিগ্গেস করলেন, “উনি কে? ঐ যে কানে মাকড়ি?”

বুড়ি তেড়িয়া হয়ে উঠল, “উঁটি আমার ছেলে আর ঐ রোগা মানুষটি আমার স্বামী। কেন, আপনার কোনো আপত্তি আছে? না কি আর কিছু জিগ্গেস করবার আছে?”

ঠান্দিদি-বললেন, “তা বাছা, আছে বৈকি। তোমাদের এখানে ব্যাপারখানা কি বল তো? রাত্রিরে লণ্ঠন নিয়ে আনাগোনা। চানের ঘরে চোরা দরজা, মাটির নীচে গলিঘুঁজি, গোপন ঘরে বাস্ক-প্যাঁটারা—এ-সব চোরাই মাল নাকি?”

ঘরে এমনি চুপচাপ যে একটা আলপিন ফেললে শোনা যায়।

বুড়ি বললে, “কেন, তাতে যদি আপনার আপত্তি থাকে তো দিন না ধরিয়ে। বাইরেই তো পুলিশের সঙ্গে আপনাদের আত্মীয়-স্বজমরা ঘোরাফেরা করছে, ডাকুন না ওদের।”

শ্রামাদাসকাকা আর বিরিঞ্চিদা ঠান্দিদিকে বলতে লাগল, “কি দরকার ছিল তোমার এ-সবের মধ্যে নাক গলাবার? এখন আশুক পুলিশ আসুন সৈজদাদামশাই, আসুন পিসেমশাই, তুমি বোলো আমরাও ঝুলি।”

পকেটে এক কুচি চুইং-গাম পেঁটে ছিল, সেটিকে বের করে, লোম ছাড়িয়ে মুখে পুরতে যাব, অমনি বন্ধ দরজায়-আবার ঠেলা। বাইরে থেকে মোটা গলার ডাক শোনা গেল, “দরজা খুলুন মশাই, আমরা পুলিশের লোক। না খুললে বোমা দিয়ে দরজা ভেঙে ঢুকব।”

ঘরময় চুপচাপ। বাজের ভেতরে, বাজের পিছনে, হার্মোনিয়ামের পাশে, পর্দার আড়ালে, যে যেখানে পারল লুকিয়ে পড়ল। রোগা ভদ্র-লোক আর তাঁর ঝাঁকড়া-চুল ছেলে তরতর করে অস্থ একটা মাচারা চড়ে বসল।

বাইরে থেকে বোধ হয় ইন্সপেক্টরবাবুই হবেন, হাঁক দিয়ে বললেন,  
“যে দরজা খুলবে তাকে পাঁচ টাকা দেব।”

তার পরই একটা অদ্ভুত গাঁক-গাঁক শব্দ, “ওরে বাবা রে! মেরে ফেললে রে। খেয়ে ফেললে রে। ওরে হারান হতভাগা, হাঁ করে দাঁড়িয়ে রয়েছিস যে, শুট কর—উ হ হ হ? কামড়ে দিয়েছে রে। এই শুট কর, শুট কর।”

দাঁড়িওয়ালা এক দৌড়ে দরজা খুলে হাট করে দিল। ব্যস্ত হয়ে ডাকতে লাগল, “আ-আ-আ, টেপি-টেপি-টেপি, কিত্-কিত্-কিত্, আয় টেপি-টেপি তি-তি-তি।”

আর দেখতে দেখতে দরজার সামনে এসে দাঁড়াল লাল চোখওয়ালার ভীষণ হিংস্র চেহারার সেই গোরুটা, সঙ্গে আবার ঠিক তারই মতন দেখতে একটি বাচ্চা।

দাঁড়িওয়ালা তাদের গায়ে মাথায় হাত বুলিয়ে আদর করতে লাগল, “ওরে আমার সোনামুখো বেচারারা। তোদের সঙ্গে দুষ্ট লোকেরা কত খারাপ ব্যবহারই-না করেছে। আহা বাছা রে, একেবারে মুখগুলো শুকিয়ে গেছে।”

পুলিশরা যে গোরুর ভয়ে কে কোথায় ভেগেছে তার পাত্তা নেই।

এদিকে টেপি আর টেপির বাচ্চা, খিদের চোটে, বুড়োর পেণ্টেলুন-টাই খেতে আরম্ভ করে দিয়েছে।

“এই টেপি কি হচ্ছে কি। টেপি সাবধান। নাঃ, এ তো ছাড়ে না দেখি—দাঁড়া, তোদের খাবার ব্যবস্থা করছি।”

এই বলে বুড়ো ভাঙা মাচার দড়ি খুলে, তাই দিয়ে গোরু-ছটাকে বেঁধে সঙ্গে নিয়ে চলে গেল।

আমরাও দারুন একটা সোয়াস্তির নিঃশ্বাস ছেড়ে, যে বার জায়গা থেকে বেরিয়ে এলাম। এতক্ষণ বাদে আমিও চুইং-গামটাকে আঙুল থেকে ছাড়িয়ে মুখে পুরলাম।

অমনি একটু কাষ্ঠ হেসে ইন্সপেক্টরবাবু, গোটো দশ পুলিশ, সেক্-

দাদামশাই আর বিরিঞ্চিদার পিসেমশাই ঘরে এসে ঢুকলেন।

চমকে গিয়ে চুইং-গামটা চেবাবার আগেই গিলে ফেললাম। ধং।

### বারো

সারি সারি তো সব এসে ঢুকল। এদের হাত থেকেই পালাবার জন্তে কাল থেকে কি না করা হয়েছে! যাক গে, ঘরের মধ্যে যারা ছিল, তারা ঝগড়াবাঁটি ভুলে দল বেঁধে, তৈরি হয়ে নিল। প্রথমে দাঁড়ালেন জমিদারবাবু, তার পাশে ঠান্দিদি, তার পর শ্যামাদাসকাকা, তার পর বিরিঞ্চিদা, তার পর বুড়ি, তার পর ঝাঁকড়া-চুল, তার পর রোগী বেচারী আর সব শেষে, একটু পেছনের দিকে সরে, আমি।

ঘরের মধ্যে দেখলাম এ ছাড়াও বারো চোদ্দাজন লোক।

ইন্সপেক্টরবাবু পকেটে থেকে একটা ছোট্ট কালো খাতা আর লাল পেন্সিল বের করে বললেন, “কোথা থেকে যে শুরু করব ভেবে পাচ্ছি নে। ভুবনডাঙার ঠ্যাঙাডেরা ধরা পড়বার পর একসঙ্গে এতগুলো ক্রিমিনাল দেখা গেছে কি না সন্দেহ।”

পাশে যে লোকটা দাঁড়িয়েছিল, সে দেখলাম খোসামুদের একশেষ, এক-গাল হেসে বললে, “হাঁ স্যার, দেখবেন এবার খবরের কাগজে আপনার নাম বের হবে। একটা চক্র-টক্রও পেয়ে যেতে পারেন, বলা যায় না, হয়তো তিসরা বিভাগ।”

“ঐ ছোট্ট ছেলেটাকে দিয়ে শুরু করে দিন স্যার, কচি আছে, ধমক-ধামক করলে হয়তো একটু-আধটু সত্যি কথা বললেও বলতে পারে।”

তাই শুনে বিরিঞ্চিদার পিসেমশাই এমনি অদ্ভুত চেঁচিয়ে উঠলেন, “ও কাজও করবেন না মশাই, ওর কচিপানা মুখ দেখে বিচার-বুদ্ধি হারাবেন না। ঐ হল গিয়ে পালের গোদা, মশাই, ঐ হল সর্দার।”

সেজদাদামশাই কি বিরক্ত!

“আরে রাখো! তোমাদের বিরিঞ্চিটিও কম পাজি নয়।”

ইন্সপেক্টরবাবু হকচকিয়ে গেলেন মনে হল, একবার এর মুখ

দেখেন, একবার গুর মুখ। শেষটা আমি নিজেই এগিয়ে এসে বললাম, আমার নাম গুপী চক্রবর্তী, বয়স এগারো, ক্লাস সেভেনে পড়ি, মাথায় সাড়ে চার ফুট, ওজন—”

ইন্সপেক্টরবাবু বিরক্ত হয়ে বললেন, “খামো ছোকরা। বড় বেশি কথা বল!”

দেখলে তো মজা? আবার ঠান্দিদিকে জিগ্গেস করলেন, “আপনার নাম আর ঠিকানা?”

ঠান্দিদি মাথায় কাপড় আরো টেনে দিয়ে ইন্সপেক্টরবাবুর দিকে পিঠ ফিরিয়ে বললেন, “ও মাগো!”

সেজদাদামশায় বললেন, “লিখুন, নিস্তারিণী দেবী। ৪৩ হরিশঙ্কর লেন, কলিকাতা।”

ইন্সপেক্টর এ-সবই খাতায় টুকে বললেন, “এখানে আসার অভ্যর্থনা—?”

বিরিক্দিদা বুঁকে পড়ে বললে, “গয়ার কথাটা বলবে।”

সেই খোসামুদে লোকটা বললে, “উহ! সাক্ষীকে হামলা করবেন না!”

ঠান্দিদি ভারি খুশি হয়ে বললেন, “গয়ার যাচ্ছিলুম, পথ হারিয়ে এখানে আশ্রয় নিয়েছি, তাতে দোষটা কি হয়েছে গা?”

ইন্সপেক্টরবাবু তাই টুকতে যাচ্ছিলেন, এমন সময় সেজদাদামশাই ছুটে এসে রেগে-মেগে বললেন, “কি মিছে কথা! পাছে আমার গুরুদেবকে—এদের সামনে তাঁর ৬ নাম করাও পাপ—পাছে তাঁর চরণে আমার মার গয়নাগাটিগুলো দিয়ে ফেলি, তাই তুমি সে-সব নিয়ে সরে পড় নি বলতে চাও, বোঁঠান? ঐ গয়নার তিন ভাগের এক ভাগ তোমার, বাকি আমার আর ইয়ে গুপীর বাবার। ওদিকে গুরুদেব সোনার গাড়ুর অভাবে কি কষ্টই না পাচ্ছেন?”

ইন্সপেক্টর খচ্‌খচ্‌ লিখতে লিখতে, একবার থেমে সেজদাদামশাইয়ের জামা ধরে টেনে জিগ্গেস করলেন, “গুরুদেব কার সোনার গাড়ু নিয়েছেন

না কি যেন বললেন, ভালো করে শুনতে পেলাম না ! আরেকবার কথা-  
গুলি বলবেন স্মার ?”

শুনে তো আমার দারুন হাসি পেল। সেজদাদামশাই কিন্তু কোনো  
উত্তর না দিয়ে কপালের ঘাম মুছতে লাগলেন। ইন্সপেক্টর একটু  
অপেক্ষা করে বুড়িকে বললেন, “আপনার নাম ও পেশা ?

বুড়ি বললেন, “আমার নাম স্বভাবসুন্দরী দাসী। আর পেশার কথা  
আমি কিছু বলতে পারব না, সে আমার অনেক উপকার করেছে।”

খোসামুদে লোকটি বললে, “কি আপদ। পেশার কথা কে শুনতে  
চায় ? আপনার কি করা হয় তাই বলুন।”

“আর কি করা হবে ? রান্না করা হয়। আমার খোঁকা কিন্তু  
জমিদারবাবুকে চেনে না।”

খোঁকা বুড়ির হাত ছাড়িয়ে হাঁড়ি-মুখ করে বললে, “এতদিন চিনি নি,  
এবার খুব চেনা গেছে। দিন, মশাই, আমার একশো টাকা।”

জমিদারবাবু তার পিঠে হাত বুলিয়ে বললেন, “আহা, খামো খামো,  
বলেছি তো দেব।”

ইন্সপেক্টরবাবু হতাশ হয়ে পাশের লোকটিকে বললেন, “আমি তো  
কিছু বুঝে উঠলাম না, শঙ্কু, তুমি একটু দেখ তো !”

শঙ্কু তখন তড়ুতড়ু করে এগিয়ে এসে বিরিকিঁদা আর শ্যামাদাস-  
কাকাকে লাইন থেকে টেনে বের করে এনে, ধমক দিয়ে বলল,  
“আপনারাই যে রিকলিডার সে কথা অস্বীকার করে কোনো ফল হবে না  
মশাই, আপনাদের কপালে লেখা রয়েছে বদমায়েস, ধড়িবাজ। বিলেতে  
ঐ যে সব চোরাকারবার ধরা পড়েছে, তার গোড়াতেও যদি আপনারা  
থাকেন তো কিছুই আশ্চর্য হব না। নিন, এখন ভালো চান তো বলে,  
ফেলুন আগাগোড়া সব ব্যাপারটা।”

তখন বিরিকিঁদা আর শ্যামাদাসকাকা ঢোক গিলে, জিব কামড়ে,  
আমতা আমতা করে, একজন থেমে, একজন জোরে, আমাদের কলকাতা  
থেকে রওনা হওয়ার পর থেকে সব কথা মোটামুটি বলল।

শুনে ইন্সপেক্টরবাবু বললেন, “বটে।”

তার পর বিরিক্షিদার পিসেমশাইয়ের দিকে ফিরে বললেন, “কি যেন বলছিলেন আপনি?”

পিসেমশাই বললেন, “কি আর বলব মশাই, আমার বন্ধু ঘেঁটুর মেয়ের সঙ্গে ওর বিয়ে-টিয়ে ঠিক। টোপার কেনা, পুরুতঠাকুরকে বায়না, বর-পণের টাকা হাফ ও নেবে আর হাফ আমি নেব সব ঠিক, আর মাঝখান থেকে একেবারে ভাগলুয়া। বল, হতভাগা পালালি কেন?”

বিরিক্షিদা মুখ লাল করে বললে, “শ্যামাদাস যে বললে, ঐ মেয়ে ভীষণ রাগী, নাকি চটে গেলে নাক দিয়ে ধোঁয়া বেরোয়?”

“কি? শ্যামাদাস বললে! বাঃ চমৎকার কথা, শ্যামাদাস বললে। আর শ্যামাদাস কি করেছে তা জানিস। নিজের মামাকে বেদম পিটে বাড়ি থেকে পালিয়েছে। কেন তা জানিস? কারণ মামা বলেছিল বলাই চাটুঘোই-বা কি, আর গোষ্ঠ পালই-বা কি, ছিল শুধু একজন—বাস্, ঐ পর্যন্ত তার নামটুকুও বলবার আগেই মামাকে একেবারে ফ্ল্যাট, একেবারে মাটিতে বিছিয়ে দিয়েছে এত বড় পাজি। কেমন ঠ্যাঙেড়ে সব সঙ্গী জুটিয়েছ, এবার বুঝতে পারছ আসা করি?”

বুড়ি এতক্ষণ হাঁ করে সব শুনছিল, এবার বললে, “ওমা। কোথায় যাব গো। একটা চোর, একটা ফেরারি, একটা খুনে। ঐ ছোকরাটার কথা তো জিগংগেস করতেও ভয়ে হাত-পা পেটে সঁদোচ্ছে। এই হাত-চারটে লোক আমাদের বাড়িতে রাত কাটান তবু যে বেঁচি আছি তাই রক্ষ!”

ইন্সপেক্টরবাবু একটু হাসলেন।

“যা বলেছেন মা-ঠাকরুন। এবার আশ্বিন, এই-সব চোরাই মালের গাদার একটা হিসেব দিন।”

বুড়ি যেন আকাশ থেকে পড়ল।

“ওমা বলে কি। আমার বিয়ের যৌতুক বাবা কত কষ্ট করে দিয়েছিল পঁচিশ বছর ধরে আগলেছি না। যাতে উই না ধরে, যাতে

ডাকাতের না নেয়, তাকে বলে কিনা চোরাই মালা।”

বলে একটা ভাঙা হার্মোনিয়ামের পিঠে হাত বুলতে লাগল।

এমনি সময় দাড়িওয়ালা ফিরে এসে ঘরে ঢুকতেই ইন্সপেক্টরবাবু মনিব্যাগ বের করলেন, “ক মাসের মাইনে দেয় নি?”

বুড়ো তো আহ্লাদে আঁটখানা।

“ছটি মাস দেয় নি স্থার। সম্পর্কে দাদা হই, সব কাজ করিয়ে নেয়, নিজেরদের গোরুকে নিজেরা ভয় পায়। ছ মাস মাইনে দেয় নি, ছ বোলোং চৌষট্টি।”

ইন্সপেক্টরবাবু গুর হাতে একটা দশ টাকার নোট গুঁজে দিয়ে বললেন “আপাতত এইটে নাও তো। আচ্ছা এ-সব জিনিস চুরি করে আনে কারা? চালানই-বা করে কারা?”

বুড়ো খুশি হয়ে বললে, “সে আমাদের লোক আছে স্থার, নিজের হাতে সব ট্রেনিং দিয়েছি। কম সে কম পনেরো-কুড়িজন ভাড়া খাটে। সব চেয়ে ঢালাক কে জানেন?—ঐ বাঁকড়া-চুল—উম্মা—”

বুড়ি আর রোগা বেচারী গুর মুখ চেপে ধরে বলল, “না দেখুন ভীষণ মিথ্যেবাদী, দেখুন।”

ইন্সপেক্টর সব কথা খাতায় টুকে নিয়ে বললেন, “ব্যস, মালায় ব্যাপার ছাড়া আর সব পরিষ্কার হয়ে গেল। কিছু ভাববেন না আপনার, ফাঁসি বন্ধ করে দেব। চাই কি এক আধজনকে জেলে না-ও দিতে পারি।—কিন্তু মালাটাই যে ভাবিয়ে দিলে মশাই। ওটি না পেলে কি মাইনে বাড়বে? দেখুন জমিদারবাবু, এতক্ষণ কিছু বলি নি এবার কিন্তু রেগে গেছি। আপনি নাহয় বড়লোক কিন্তু তাই বলে আমার উন্নতি রক্ষ করে দিতে পারবেন না। ঠিক বলছেন এটা আপনার মালা নয়?”

জমিদারবাবু মাথা নাড়লেন। ইন্সপেক্টরবাবু বিরক্ত হয়ে বললেন, “নয় কেন বলুন? এটা কিসে মন্দ?”

জমিদারবাবু মহা কাঁপরে পড়ে গেলেন, “ইয়ে—মানে এটা আমার



গিন্দি পরতেন না—ঐ ঝাঁকড়া-চুল—” এইটুকু বলেই জমিদারবাবু থামলেন।

“আহা থামলেন কেন? ঐ ঝাঁকড়া চুল কি?”

জমিদারবাবু কিছু বলবার আগে সে হোকরাই এগিয়ে এসে বলল,  
“আমি বলব স্মার?—”

জমিদারবাবু ব্যস্ত হয়ে তার কাছে ছুটে গিয়ে বললেন, “আরে চুপ চুপ, দেব রে একশো টাকা নিশ্চয় দেব। এ তো দেখি আচ্ছা গেরো।”

ইন্সপেক্টর বললেন, “দেখুন বাজে কথা রেখে আগাগোড়া খুলে বলুন।”

জমিদারবাবু কৌচাঁ দিয়ে মুখ মুছলেন।

“একটুও বাদ দিতে পাব না?”

“না সব গুনব।”

“কিন্তু—কিন্তু—গিন্দি যে রেগেমেগে পুলিশের সম্বন্ধে—”

“আচ্ছা আচ্ছা সেইটুকু নাহয় ছেড়েই দিবেন।”

জমিদারবাবু তখন একটা নিচু দেখে বাজের ওপর বসে পড়ে বললেন, “বেশ তবে সব কথাই শুনুন। আমাদের সাত পুরুষের জিনিস ঐ মালা। লাখ টাকা ওর দাম। লাখ টাকা দিয়ে ইন্সিওর করা। হারালে লাখ টাকা পাওয়া যায়। গিন্দি প্রাণ দিয়ে সেটি আগলান। সারাদিন গলায় ঝোলে, সারারাত বালিশের নীচে থাকে। সেই মালা বালিশের তলা থেকে উধাও। কেউ কোথাও নেই, ঘর ভেতর থেকে বন্ধ, শুধু বালিশের নীচে মালাগাছি নেই।

“তাই নিয়ে গিন্দি যে অতটা রসাতল করবেন এ আমার ভাবনার বাইরে ছিল মশাই। আর ইন্সিওরেন্স কোম্পানিকে বছরে বছরে টাকা গুনে দেওয়া হয়েছে, তাদের বাঙালি সায়েবরও যে কি সন্দেহবাতিক সে আর কি বলব! কেমন করে গেল, কোথা দিয়ে গেল বললেই হল কিনা চুরি, দেব না টাকা, আগে প্রমাণ করুন সত্যি চুরি গেছে। এইরকম বলে! তখন কি আর করা যায়, এই হোকবার পায়ের ছাপটা:

দেখাতে হল।”

শুনে সবাই অবাক, “ওমা সে কি ? ছোকরার পায়ের ছাপ আবার কি ?”

জমিদারবাবু তখন অপ্রস্তুত মুখ করে জিগ্গেস করলেন, “সত্যিই কি সবটা বলতে হবে, গিন্নি শুনলে—”

“আহা কি জ্বালা, বলুন বলুন, গিন্নিকে আবার কে বলতে যাচ্ছে ?”

“তবে শুনুন। ইয়ে মানে ছোকরাকে বললাম তোকে কিচ্ছু করতে হবে না, জানলার বাইরে দাঁড়াবি আমি গরাদের ফাঁক দিয়ে গলিয়ে দেব, তুই উধাও হবি। পরে রেলের ফ্রসিং-এ আমার হাতে দিয়ে দিবি। তা হলে তোকে একশো টাকা দেব। কোনো বিপদ নেই। বলুন মশাই, ছিল ওর কোনো বিপদ যে এখন ওরকম তেড়িয়া হয়ে থাকবে ?”

“না, না, সে তো বটেই।”

“সে তো বটেই আবার কি ? ব্যাটা মালা নিয়ে বেমালুম উধাও। রেলের ধারে তার দেখা নেই। এদিকে গিন্নির জ্বালায় আমি যেখানে বাই পুলিশও সঙ্গে-সঙ্গে হাঁটা দেয়। সেই থেকে আপনারা যে আমার পেছনে ছিনেজাঁকের মতো এক নাগাড়ে লেগে রয়েছেন মশাই। দে রে বাপ মালাটি, ইন্সিওরের টাকায় আমার কাজ নেই, মালাটা এখন গিন্নিকে ফিরিয়ে দিতে পারলেই বাঁচি।”

ছোকরা অমনি শ্বামদাসকাকাকে দেখিয়ে দিলে।

“আপনার কথায় বিশ্বাস করেই মালা নিয়ে সরে পড়েছিলাম, আপনারাই যে পেছনে পুলিশ লাগাবেন তা কি আর ভেবেছিলাম। রেলের ধারে গিয়ে দেখি ধরপাকড় চলছে, তখন বেগতিক বুঝে ঐ ভদ্রলোকের পকেটে মালা চালান করে দিলাম। ওকে জিগ্গেস করে দেখতে পারেন। আমি নাকে-কানে খৎ দিয়েছি সোনাডানা আর ছোঁব না। ইস্কুলে ভর্তি হব। যদি মর্টু পটলাদের ক্লাসে নেয় অবিশি।”

তাই শুনে বুড়ি আর বেচারী ভদ্রলোক হাউমাউ করে কাঁদতে কাঁদতে ওকে সে কত আদর ! ঐ বুড়ো খাড়ি ছেলেকে ভাব একবার !

## তেরো

এদিকে সবাই তো শ্বামাদাসকাঁকার দিকে তাকিয়ে আছে। সে তখন দুই পকেট উলটে দিয়ে, দুই হাত শূণ্ণে তুলে বললে, “প্রমিস, আমার কাছে নেই। দেখতে পারেন ঝেড়ে-ঝুড়ে। মালা কোন কালে ঐ গুপে লক্ষ্মীছাড়াকে দিয়ে দিয়েছি। কি দরকার রে বাবা পরের জিনিসে, বিশেষ করে যখন তার মধ্যে এত বিপদ! গুপে, মালা দিয়ে দে, ভালো চাস তো।”

আমিও তখনি সার্ট খুলে ফেলে দিয়ে, প্যাণ্টেলুন ঝেড়ে-ঝুড়ে সবার সামনে দেখিয়ে দিলাম যে আমার কাছে মালাটালা তো নেই-ই, অনেক-গুলো বোতামও নেই।

ইন্সপেক্টরবাবু অবাক হয়ে গেলেন।

“তা হলে সেটাই-বা গেল কোথায় আর এটাই-বা কার ?”

ঝাঁকড়া-চুল আবার এগিয়ে এসে মাথা চুলকে বললে, “আজ্ঞে স্তার গুটা আমার। বাবার মনোহারি দোকান থেকে নিয়েছিলুম।”

বেচারী ভদ্রলোক অনেক সয়ে ছিলেন, এবার কিন্তু দারুন রেগে, ছেলের দুই কান মলে দিয়ে বললেন, “কেন নিয়েছিলি হতভাগা, বল নিয়েছিলি কেন? তাই চেনা-চেনা লাগছিল।”

ছেলে বললে, “পরে প্রাইভেটলি বললে চলত না? আহা, অত চটে কেন বল তো? দুজনারই লাভ হত।”

ইন্সপেক্টরবাবু আবার নোট বই খুলে বললেন, “ধীরে ধীরে বল, নইলে টোকা যায় না।”

ঝাঁকড়া-চুল বললে, “বলে-টলে শেষটা ফ্যাসাদে পড়ব না তো?”

“আরে না না। তা ছাড়া, পুরুষ-বাচ্চা, পড়লেই-বা অত ভয় করলে চলবে কেন?”

“না, তবে জেলে দিলে তো আর চন্দননগরে খেলতে যাওয়া যাবে না।—আচ্ছা, দশ টাকা দেন তো বলতে পারি।”

ইন্সপেক্টর হতাশ হয়ে শব্দকে বললেন, “তাই দাও তো এক।”

ছোকরা ভারি খুশি হল।

“বুঝলেন আর, ভেবেছিলাম জমিদারবাবু কাছে এইটে চালিয়ে দিয়ে, আসলটা বেঁচে সারাটা জীবন সুখে থাকব।”

জমিদারবাবু হতভম্ব।

“ইস্! কি সাংঘাতিক বিশ্বাসঘাতক।”

বুড়ি দারুন চটে গেল।

দেখুন, সাবধানে কথা বলবেন। খোকর একটা মান-সম্মান আছে তো। তা ছাড়া যে নিজের স্ত্রীর মালা নিজে চুরি না করে লোক ভাড়া করে করায়, তার মুখে অত কথা শোভা পায় না।”

বিরিঞ্চদা, শ্যামাদাসকীকা আর আমি বলতে লাগলাম, “তার পর? তার পর কি হল?”

ঝাঁকড়া-চুল বিরক্ত হয়ে বললে, “হবে আবার কি ছাই।” তোমরা আসল মালা নিয়ে হাওয়া। আমি নকল মালা নিয়ে বাড়ি এসে দেখি, মার দিয়ে কেলা—শিকার ঘরের মধ্যে। কিন্তু হবে কি গোরু-খোঁজা করেও তো মালাটা পেলুম না। কি করলে বল দিকিনি? ভুল করে আমার মালাটাও কার যেন পকেটে ফেলে রাখলাম। ওদিকে আসলটা কোথাও পেলাম না।”

ইন্সপেক্টরবাবু আমার দিকে তাকালেন।

“কচি মুখ দেখে বোঝা যায় না তুমি কত বড় শয়তান। মালা বের করে দাও।”

সেজনাদামশাইও ধমক দিতে লাগলেন। “ভালো চাস তো এখনি দিয়ে দে হতভাগা। আগে থেকেই জানি শেবটা এমনি হবে। তোর বাবাকে তখনি বলেছিলাম, দিস্ না ওকে হাতঘড়ি কিনে, ওতেই ওর কাল হবে। তা কে শোনে বুড়োর কথা। দে শিগ্গির মালা। কি করবি ও দিয়ে তুই? তোকে—ইয়ে—তোকে এত্তগুলো চুইং-গাম দেব।”

বিরিঞ্চদার পিসেমশাই আবার বললে, “বাস্তবিক এত্তগুলো ধড়িবাজ একসঙ্গে একটা ফ্যামিলির মধ্যে সচরাচর দেখা যায় না।”

ঘরের মধ্যে আর বাকি যারা ছিল তারাও মহা কাঁ্যাওম্যাও লাগিয়ে দিলে, “দিয়ে দে রে ব্যাটা, দিয়েই দে না ?”

“আরে দে দেও রে, আউর কেয়া,” ইত্যাদি।

শেষে জমিদারবাবু আমার কাছে এসে পিঠে হাত দিয়ে বললেন, আমার অবস্থাটা একবার ভেবে দ্যাখ বাবা, মালা না পেলে গিনি আমার একখানা হাড়ও আস্ত রাখবেন না। দে বাপ মালাটা আমিও তোকে এক ডজন চুইং-গাম দেব।”

কি আর করা। দাড়িওয়ালাকে বললাম, “সর্দার, তুমি পথ দেখিয়ে আগে আগে চলো।”

দাড়িওয়ালা তখুনি রওনা নিল, আমরা একের পর এক তার পেছন-পেছন চলললুম।

নিমেষের মধ্যে ঘর কাঁকা হয়ে গেল। কে যে মোমবাতির টুকরোটাও তুলে নিল। আমাদের পেছনের চোরা-কুঠুরি অন্ধকারে মিশে গেল।

ঘরের বাইরে সরু গলি একে-বেঁকে শেষে কয়েকটা ধাপ বেয়ে একেবারে রান্নাঘরে গিয়ে শেষ হল।

রান্নাঘরের দরজার বাইরে মোটা খুঁটিতে শেকল দিয়ে টেঁপি আর তার বাচ্চা বাঁধা রয়েছে দেখলাম। আমাদের দেখে তারা দুজন সামনের পা মাটিতে হুঁকে জিব দিয়ে ঠোঁট চাটতে লাগল।

আমরা খানিকটা তফাত রেখে পেরোলাম। দাড়িওয়ালা বললে, “আহা আমার টেঁপু-সোনার বুঝি আবার খিদে পেল।”

বাড়ি থেকে বেরিয়ে আশ্চর্য হয়ে দেখলাম, এর মধ্যে এত কাণ্ড হয়ে গেল; কিন্তু বাড়ির বাইরেটা ঠিক তেমনি আছে। বনের গাছপালাও এতটুকু বদলায় নি। শুধু রাতটা কেটে গিয়ে কখন দিন হয়ে গেছে। আকাশের মাঝখানটা ঘন-নীল, গাছের ডালপালা রোদে ঝলমল করছে আর অনেক ওপরে একটা চিল ছোট্ট একটা কালো দাগের মতো কেবলই ঘুরছে।

বাড়ি ছেড়ে যেই জঙ্গলের পথ ধরলাম, কোথেকে আরো গোটা কতক

লোক এসে জুটল। আমার মনে হচ্ছিল প্রায় সিকি মাইল লম্বা একটা লাইন হয়ে আমরা চলেছি।

শুনলাম ওরা জমিদারবাবুর সেই ইনসিওরেন্স কোম্পানির লোক।

চলতে চলতে বিরিকিঁদা পিসেমশাইয়ের কাছে গিয়ে কাঁচুমাচু হয়ে বলল, “তা হলে বিয়েটা—”

পিসেমশাই বললেন, “খাঁকু, তোর আর অত ভাবতে হবে না, আমার ভাগনে বটার সঙ্গে তার বিয়ে হবে। সে তোর চেয়ে ঢের ঢের ভালো।”

শ্রীমাদাসকাকা এবার সাহস পেয়ে বলল, “তা হলে আমার ইয়ে—”

পিসেমশাই বললেন, “আরে সে ব্যাটা কি অত সহজে মরে? আমি যে ওর কাছে টাকা ধারি। দিব্যি চাঙা হয়ে উঠেছে। মারলিই যখন আরেকটু ভালো করে মারলি না কেন?”

সেজদাদামশাই ঠান্দিদিকে বললেন, “কি বোঠান, স্ৰাজাংরা তো যে যারটা গুছিয়ে নিচ্ছে তোমার কিছু বলবার নেই?”

ঠান্দিদি কোনো কথা না বলে কাপড়ের মধ্যে থেকে একটা বড় লাল বটুরা বের করলেন। চলতে চলতে তার মুখ খুলে দু-চারটে জিনিস বেছে নিয়ে বটুরাটা সেজদাদামশায়ের পায়ে কাছে ফেলে দিলেন।

সেজদাদামশাই যেমনি সেটি তুলে নিলেন ঠান্দিদি বললেন, “গুপী, বাবাকে বলিস অর্ধেক যেন চেয়ে নেয়।”

ততক্ষণে আমরা গাছতলার বিরিকিঁদার গাড়ির কাছে পৌঁছে গেছি সেখানে এসেই সবাই গোল হয়ে দাঁড়িয়ে গেল, মাঝখানে রইলাম আমি। বললাম, “একটা খোঁচা-মতন জিনিস চাই। সোয়েটার বোনার একটা কাঁটা দাও ঠান্দিদি।”

ঠান্দিদি হাঁড়িমুখ করে বললেন, “এ বেঘোরে সে আমি কোথায় পাব?”

মুয়েদের যা কাণ্ড সঙ্গে একটা দরকারি জিনিস অবধি রাখে না। বললাম, “তা হলে একটা লাইন-টার্না রুমাল হলেও চলবে।

সবাই চুপচাপ। বললাম, “তা হলে কি জিনিসের আভাবে সব পণ্ড

হয়ে যাবে ?

তখন শ্রামাদামকাঁকা গাড়ির ভেতরের খোঁপ থেকে একটা লম্বা শক্ত তার বের করে দিল। আমি সেটি নিয়ে সামনের বাঁ দিকের জানলার ভেতরে গুঁজে দিয়ে অনেক কসরৎ করে মালাটা বের করলাম।

কাল জানলার কাঁচ তোলবার সময়, হাত থেকে ফস্কে কাঁচের পাশ দিয়ে, খাঁজের ভেতর পড়ে গেছিল।

মালাটাকে পেটেলুনে ঘষে তুলে দেখলাম। মাঝখানকার হীরেটা ধুকধুক করতে লাগল। জমিদারবাবু ছুটে এসে বললেন, “আরে এই তো আমার হারানিধি! এরই জন্তে তো আমি ঘরছাড়া। দে রে বাপ, একটু বুকু করি!”

সঙ্গে-সঙ্গে ইন্সিওরেন্স কোম্পানির লোকেরাও এগিয়ে এল। তাদের মধ্যে একজনের চোখ হঠাৎ ছোট হয়ে উঠল।

“সে কি মশাই! এটাও যে মেকি!”

আমরা ধমক দিয়ে উঠলাম, “বললেই হল মেকি! এইটেই জমিদারবাবুর গিন্নির আদৎ মালা। মেকি হবে কেন।”

সে লোকটা কিছুতেই খামবে না। “আরে মণি চেনাই আমার পেশা। তার জন্তু এরা আমাকে তিনশো টাকা মাইনে দেয়, আমি নকল মুক্ত চিনব না? কি যে বলেন। এ যদি সাঁচা হয় তো আমি—”

জমিদারবাবু বললেন, “স্-স্-স্—চুপ চুপ, ও কথা মুখে আনবেন না, গত বছর নেহাৎ ঠেকায় পড়ে সেটি বেচতে বাধ্য হয়েছিলাম। তা এটাই-বা মন্দ কিসের? পঁচিশ টাকার পক্ষে কি এমন খারাপ বলুন? গিন্নিই যখন টের পান নি, আপনাদের আর কি আপত্তি থাকতে পারে?”

তারা বললে, “আপত্তি কিছুই নয় তবে কোম্পানীতে রিপোর্ট করে দিতে বাধ্য আমরা।”

“তা করুন গে রিপোর্ট, করুন পাশপোর্ট, খালি আমার গিন্নি যেন না শোনে। চেপে যান মশাই, পাঁচ টাকা খাইয়ে দেব সবাইকে।”

দাড়িওয়ালা বলল, “পাঁচ টাকাই নেই আপনার, খাওয়াবেন কি দিয়ে?”

ইন্সপেক্টর বললেন, “সবই বুঝলাম বাড়ির তলার গোলকর্থাখা ছাড়া।

বুড়ি বললে, “বলুন আমাদের সবাইকেই ছেড়ে দেবেন, তা হলে বলে। খোকা ইঙ্কলে পড়বে, আমবাও রিটারার করব।”

ইন্সপেক্টর হাসলেন, “কাজটা আপনারা যে খুব ভালো করেছেন বলছি নে; তবে কি না আপনার নামে তো আর কেস হচ্ছে না ঠাকরুন। জমিদারবাবুর গিন্নির মালা খুঁজে দেবার কথা, সে তো দিয়েইছি। গিন্নিমাই আমাকে পুরস্কার দেবেন। আপনাদের নামে কেস যখন হবে তখন হবে। আপাতত জিনিসগুলো সব জমা দিয়ে দেবেন।

বুড়ি বললেন, “আর আমার খোকা?”

শম্ভু বলল, “ঘুব খায়, আবার খোকা।”

খোকা রেগে গেল। “এক পয়সা পেলাম না মশাই, আবার ঘুব খাই, মানে?”

জমিদারবাবু দাড়িওয়ালার দিকে তাকালেন। সে বললে, “নেই বলছি ওঁর টাকা।”

বুড়ি বলল, “শুধু তা হলে। সেকালে বাড়িটা ছিল এক সাহেবের। সে জুতো পচিয়ে এখানে মদ তৈরি করত। দেখতে দেখতে বড়লোক হয়ে গিয়ে দেশে চলে গেল। পরে সে লাটসাহেব না বড় ডাক্তার না কি যেন হয়ে আবার এসেছিল। খুব সস্তায় বাড়ি বেচে দিয়ে গেল। ঠাকুরদা কিনে রাখলেন, বাবা আমাকে যৌতুক দিলেন। অমন ভালো শুল্ক পড়ে থেকে নষ্ট হচ্ছে দেখে, আমরা ওগুলোকে একটু কাজে লাগালাম। দোষ তো আমাদের এইটুকু।”

ইন্সপেক্টরবাবু খাতা-পেন্সিল পকেটে পুরে জমিদার-গিন্নির মালা হাতে নিয়ে জমিদারবাবুকে বললেন, “চলুন।”



বুড়ি আর বেচারী ভদ্রলোক গুঁদের সঙ্গে-সঙ্গে অমুনয়-বিনয় করতে করতে চললেন।

অমনি কর্পূরের মতো সবাই যার যেখানে মিলিয়ে গেল। পিসেমশাই, সেজদাদামশাই পর্যন্ত চলে গেলেন। বাকি রইলাম আমি ঠান্দিদি বিরিক্ষিড়া আর শ্যামাদাসকাকা।

আমরা ফ্যালফ্যাল করে এ গুর দিকে চেয়ে রইলাম। খানিক বাদে আমি বললাম, “এক ডজন চুইং-গাম কি সত্যি কেউ কাউকে দেয়।”

বিরিক্ষিড়া আর শ্যামাদাসকাকা একসঙ্গে বলে উঠল, “কক্ষনো দেয় না। বরাবর তোকে বলছি না জীবনটা হচ্ছে খানিকটা রাবিশ, একটা ডাস্টবিন। এখন চল, একটা কারখানার চেষ্টা করা যাক।”

ভারি খুশি লাগল, ভাবলাম বগাই নিশ্চয় আমাকে কাল সারাদিন—রাত খুঁজেছে।

॥ সমাপ্ত ॥

শুদ্ধিপত্র : ২নং পাতা হইতে ৩২নং পাতার শুধু জোড় পাতাগুলি লীলা মজুমদার রচনাবলীর পরিবর্তে ‘গুপীর গুপ্তখাতা’ হইবে।